

四庫全書

集部

欽定四庫全書

集部

誠意伯文集卷三

詳校官庶吉士臣范逢恩

中書臣劉源溥覆勘

總校官編修

臣

王燕緒

校對官編修

臣

秦泉

謄錄監生

臣

秦鴻甲

欽定四庫全書

誠意伯文集卷三

明 劉基 撰

覆瓿集三

古詩

種懷香

懷香體虛柔本自南土出
毛芒散纖葉旖旎怯朝日
芳菲挺衆卉辛美更無匹
況能已疢癰兼理腸胃疾
種之近庭

階離離看新茁驅童斬竹枝扶植待秋實常恐風雨惡摧折傷弱質蒺藜生道傍延蔓何綿密豈無荷鋤人夕薙旦已出上天意何如感歎靡終畢松柏多斧斤山林日蕭瑟

北上感懷

倦鳥思一枝樗馬志千里營營勞生心出入靡定止伊余朽鈍材嬾拙更無比才疎乏世用嗜僻惟書史雖非濟時具頗識素餐恥既懷黎民憂妄意古人企寧知乖圓方舉足輒傷趾塵埃百病侵貧窶萬感累艱難幸息

肩遲莫竊所喜明時登驥駟駕馬但垂耳自非冀北姿
莫羨追風駛便欲解衣冠躬耕向桑梓終懷葵藿戀不
慕沮溺詭潜陽動原隰白日暖蘭芷埒雞戒晨明客子
駕行李縈紆越巘嶧浩蕩涉風水淹留具區北信宿滄
江汜維時連年歉道路多流徙官司職撫字黔首皆赤
子陳紅太倉米豐年所儲偸為民備乏困朝廷豈私此
推餘補不足茲實王政始臣子宜奉承天威不違咫尺
何簿書曹暴慢蔑至理苟云出納各當閔鰥死嗚呼

草莽露慘惻溝瀆委聞之猶鼻酸見者宜顙泚踰淮入
大河淒涼更難視黃沙渺茫茫白骨積荒藁哀哉耕食
塲盡作狐兔壘太平戢干戈景物未應爾意者斯人徒
縱欲擾天紀鬼神赫震怒咎戾良有以去年人食人不
識弟與姊至今盜賊輩嘯聚如蜂蟻長戈耀白雪健馬
突封豕豈惟橫山澤已敢剽城市途行絕稀少空車但
牆倚身行須結集一寐四五起牧民豈無人司寇亦有
氏陣車不驅馳大田無耒耜邦家祿食恩豈為臣奉已

山東古要地燕趙猶唇齒况茲南北衝津梁通遠邇屬
當全盛時四海同一軌廟堂多稷契振舉無遺弛勿云
疥癬微不足成瘡痍滔天起濫觴炎岡發星烜虞朝有
分北漢庭煩直指農夫植嘉穀所務誅稂莠耕耘苟失
時雨露空沾灑威懷豈異任守令職非庠端能慎黜陟
此輩何足弭故鄉隔山川前途塞荆枳青徐氣蕭索河
濟俱坭滓痛哭賈生狂長歎漆室悵何當天門開清問
逮下俚

送普顏子壽赴廣西憲幕

離維荆衡南也邈走蠻徼民風雖徭蜑地勢帶蒙詔迢
迢商周前風水絕纖竅後王務廣土懷柔倚攻剽羈縻
非本情疲痼復誰療大明侔日月幽裔靡不照化育之
所加欣榮及蓬藿憲府繩百司選擇自廊廟偏方異習
俗賦性實同調培養自殊途激揚貴知要淒涼溪上瀧
鰕魚因習釣高風吹霜鵲縹緲集海嶠願言崇令業以

繼南國召

過東昌有感

夜發高唐灣旦及東昌郭喬樹拂踈星霜飛月將落仰
觀天宇清平見原野廓白楊號悲風蔓草杳漠漠但見
荆棘蔽白骨翳寒籜聖道縣日月斯人非虺蜚教養既
迷方欲熾性乃鑿展季骨已朽清風散藜藿絃歌滅遺
音繭絲盡籠絡鴟鵂憑螽蟊鳴草蟲躍遂令一變姿
化為跖與蹻况聞太行東水旱荐為虐飢氓與暴客表
裏相倚著賑卹付羣吏所務惟刻削征討乏良謀乃反

恣剽掠坐令參苓薢薢成毒腸藥今年秋租登行止稍有託餘波尚披猖未敢開一喙但恐習俗成何由返初昨藩宣有重寄胡不慎遠畧往者諒難追來者猶可作歌詩附里謠大猷希聖莫

南陵崔氏思梅詩

昔來梅花下綵服輝清尊今來不見人淚滴梅樹根梅落風不回淚落化為石冥冥入幽泉一夜千萬尺

晨詣祥符寺

上馬雞始鳴入寺鐘未歇草際起微風林端淡斜月僧
房湛幽寂假寐待明發松徑斷無人經聲在清樾

送鄭希道行省掾滿之泉州錄事

鄭君廊廟姿才識天下冠若華升朝霞可望不可翫胸
中富文史蔚蔚錦繡段公餘但好客高論幹雲漢蓮風
散秋幕微露收夕案吳雲翼行輶閩嶠入奇觀撫字侯
深仁剗繁讓明斷嘉會復何時悠悠仰飛翰

寄題俠世本東溪漁唱亭

落日去層巒清溪澹輕浪嘔啞戢柔櫓欵乃發孤唱初
隨飄風起復逐行雲颺月色照未闌灘聲雜逾壯恐有
濯纓人一聽一惆悵

發安仁驛

雞鳴發山驛天黑路彌險烟樹出猿聲風枝落螢點江
秋氣轉炎嶂濕雲難斂佇立山雨來客愁紛冉冉

發龍游

微颺獻輕涼客子中夜發秋原曠無際馬首掛高月草

蟲自宮商葉露光可掇狹徑非我由周行直如髮揚鞭
望南天晴霞絢閩越

早行衢州道中

草際生曙色林端收暝烟露花泣啼臉風葉彈鳴絃農
家喜銍艾行歌向東阡大道無狹邪平原多稻田客行
良不惡敢曰從事賢

鉛山龍泉

茲山近南服勝迹冠朱方石骨入海眼地脉通混茫金

精孕清淑水德融嘉祥寒含六月冰潤決九里長鯨顯
狎獵起虎口吐呀張發竇既窈窕流渠遂汪洋洞徹瑩
玉鑑鏘鳴合宮商靜含玄機妙動見大智藏養德君子
類膏物農夫望野僧向我言其功殊匪常飲之祛百邪
能使俗慮忘漱嚙入靈府喉舌生清香爽漸動毛髮飄
忽凌風翔何當揚湛冽盡洗貪濁腸

初食檳榔

檳榔紅白文包以青扶留驛吏勸我食可已瘴癘憂初

驚刺生頰漸若戟在喉紛紛花滿眼岑岑暈蒙頭將疑
誤腊毒復想致無由稍稍熱上面輕汗如珠流清涼徹
肺腑粗穢無纖留信知殷王語瞋眩疾乃瘳三復增永
歎書之遺朋儔

望武夷山作

飲馬九曲溪遙望武夷峯長林抱廻合丹崖造空濛浮
暉澹寒翠水木皆曼容薄遊限塵務促景尼奇蹤緬懷
紫陽子千載誰與同瓊佩邈烟霧石函閤遺封羈猿怨

幽澗飛蘿冒芳蕞
瑶琴空流泉
桂枝徒秋風
悵望佳期阻
纏綿憂思重
殷勤尺素書
願寄雲間鴻

發白沙至水口

夜發白沙驛
亭午至水口中
流鬱風霧密
雨蔽原阜冥
濛蛟龍過
隱鱗怒雷吼
傾歌卧帆席
馮翼惑前後
畏途生頃刻
顛倒亂足手
倉皇投山館
喜懼劇紛糾
攝身整衣帶
沾濕及肩肘
平生歷道路
艱險頗曾受
未能外形骸
豈敢輕衰朽
捐軀匪成仁
垂堂不宜狃
總轡登前領

煙雲尚昏黥經阻有妨虞姬文亦奔走

早發建寧至興田驛

鷄鳴戒晨裝上馬見初日露泣葉尚俯霧重山未出客
途得霽景緩步非縱佚矧茲歲有秋高下俱頽栗牛羊
散原野鵝鴨滿阡術懷抱既夷曠神情自清謐寒花蔓
籬落候蟲響蒙密霞標青楓林雪綻烏桕實幽覽雖云
遽佳趣領已悉我行固無期況乃塵事畢

題武夷圖

崇山奠朱維實維羣山園葱蘢薄光景隱顯變氣候百
泉縈虹蜺萬谷蒸饋餽深根入無底峻表切星宿嶒嶸
削劍戟窈窕錯錦繡騎雲擘高掌竇石室陰罍金雞鳴
未晨玉女來自逗琪樹縞玄霄瑤花落清晝美人遊不
還霜月怨猿猱淒涼駕壑槎無沒白玉樞蓬萊渺滄海
弱水浩浸溜良辰不可掩沉思令人瘦安得凌風翰飄
颻逐飛鷺尋源挹孤清寥林摘三秀逍遙觀物化俛仰
空宇宙真詮倘可求吾將解吾綬

孔子充相送至鵝湖

憶昨過武夷欲往無與儔
今茲逢故人遂得鵝湖遊
輕雲翼征蓋翔風當鳴騶
古塔挿蒼藹寺門啟平疇
陟徑既紆鬱馮軒亦樛流
雲旗裊香霧金像明清秋
昔賢論道處松柏深且幽
鴻飛渺滄海龍去空靈湫
懷人已寂寞對景空淹留
興闌成遠別馬首山悠悠

自衢州至蘭溪

秋郊斂微雨霽色澄人心
振策率廣路逍遙散煩襟
踈

煙帶平原薄雲去高岑湛湛水凝碧離離稻垂金薺麥
霜始秀玄蟬寒更吟幽懷耿虛寂好景自相尋心契清
川流目翫嘉樹林歌傳滄浪調曲繼白雪音仙山在咫尺
早晚期登臨

九日舟行至桐廬

杪秋天氣佳九日更可喜衆人競登山而我獨泛水江
明野色來風淡汲鱗起蒼翠觀遠峯次寥度清沚沙禽
泛悠颺岸竹搖蘿靡沂湍懷謝公臨瀨思嚴子紫萸空

俗佩黃菊漫妖蕊落帽非我達虛疊非我耻扣舷月娟
娟濯足石齒齒澄心以逍遙抵流任行止

從軍詩五首送高則誠南征

少小慕曾閔窮閭兀幽棲丘園賁嘉命通籍廁金閨握
筆事空言塊焉愧梁鶴不如屬橐鞬結束習鼓鼙廟筭
出帷幄白日收虹蜺劒光帖滄溟旗尾縣鯨鯢振旅還
大藩歌舞安旄倪拂衣不受賞長揖歸蒿藜

江鄉積陰氣二月春風寒壯士縵胡纓伐鼓開洪瀾長

風翼萬軸撇若橫海翰馬銜伏轅門翊衛森水官仗鉞
指天狼怒髮衝危冠

按節肅徒旅神劒宵有聲揮揮大旗動烈烈刀斗鳴仰
看太白高俯視滄波平王師古無戰蟪蝼安足烹
人言從軍惡我言從軍好用兵非聖意伐罪乃天討運
籌中堅內決勝千里道雷霆馘蛟鼉雨露澤枯槁懷柔
首悖獨延訪及黎老牧羊必除狼種穀當去草凱歌奏
大廷天子長壽考

清晨絕長江日夕次海濱北風吹旆旌軍動速若神令
嚴戎馬閑九陌無驚塵伐鼓震溟嶠揚帆役鮫人鯨鱗
京觀築鰐醢華筵陳喑喑布穀鳴祁祁農鴈春去子還
故鄉悲喜集里鄰荷鋤啟瓦礫再荷天地仁撫綏屬有
望世世為堯民

蛟谿詩

蛟乃龍之徒隱顯異凡質屈蟠深彎環靈變不可悉清
溪淥百湍漱滌見冽漂寒飈黯離晶陰電煬幽室超騰

雲雷後訶禁鬼神謐應龍翔中天渙汗濕箕畢大江揚
濁瀾鬻蜃恣狂譎閉藏當有待保養慎無失搜竒凜精
魄跼步迷故術谿巖生長風林木暮蕭瑟

題林以仁平反詩卷

木伐豈再植壁毀寧復完議獄有緩死聖言垂不刊兩
造既偏聽無辜邁凶殘况復使其孥流離播夷蠻司牧
盡瞠視佐使獨悲酸抗詞動鬼神潤澤生枯乾死者縱
不生魂魄亦獲安孤兒雖不天且得依故山聖人邁種

德惠及毛與翰云胡任民寄視之如草菅為君歌此曲
歌竟起長歎

送僕世南參政分題得虎林

深林合蒙龍仰視不見日中有白額虎哮吼恣狂獮怒
晴谷搖電棹尾原歟颺牛羊困攫取樵牧萃憂恤相公
鎮方面化捷影響疾百靈肅號令萬怪悚潛逸昔出晝
需朋今行夜辭匹泰山絕悲啼牛哀返初質豈獨惠斯
邦四海望寧謐

題山水小畫

谿上春始還微波動芳燠樹暖欲生烟山明初過雨美人期不來桂楫怨蘭杜佇立忽懷愁漁歌起洲渚

送田生歸鄉

少年客他鄉還鄉反如客莫驚新井里乃是舊阡陌歡笑集姻親觴酌上班白老翁愛英俊慰問至日夕應憐鄰舍兒魚龍雨懸隔

題李伯時畫淵明歸來圖

江左昔潰亂桓廬遁相尋劉裕起寒微長驅掃氛祲秋
草雖未枯霜雪已駸駸陶公節義士素食豈其心我才
非管葛誰能起淪沉所以歌去來歸卧五柳陰悠悠多
感激愴恨寄謳吟哲人貴知幾芳名留至今展圖三歎
息懷古一何深

題朱孟章虞學士送別圖後

秋郊一盃酒握手念將離落日照野水涼風生樹枝今
朝重相憶青山如舊時鬢毛非松柏爭得不成絲

題老翁騎馬圖

少年遠征役及歸鬢已霜戰甲零落盡空餘弓箭房老
馬同死生蹠踏沙磧長故鄉此何極仰看鴻雁行

明齋詩為湖廣陳進士賦

客從于闐來遺我盈尺璧晶光射雲漢璀璨生五色置
之暗室中鬼魅皆辟易願持自照身不用持照人

寄題江東蘭逸監司瑤芳亭

江籬悲楚佩叢桂空秋霜茲花特秀絕得升君子堂豔

色非我貴皎潔有餘光仙人美良夜鳴玉來琳琅纖雲
淡華月色映青鳳凰飄飄白霓佩左右參翱翔衆卉不
敢傍瑤臺清且涼聞有千歲寶其味如瓊漿願持壽明
主天地同久長

題揭伯洪山居圖

黃埃晦城市赤日炊達道榮華能幾何未若山居好啟
扉對平林闢徑入芳草丹崖翠蘿映青嶂白雲抱世事
幸見遺幽趣堪獨討新晴景物佳緩步隨野老倚巖聽

鳴弦息陰憩華葆蜂亂覺春暄鴻驚信秋早無榮謝馳
驅有酒任傾倒但願長兒童稼穡以為寶

會稽張氏春暉堂

喬木生山阿碩實秋離離誰知茂育功乃在陽春時丈
夫佩玉玦壯氣東西馳列鼎未酬歡倚門已生悲君看
斷根草引蔓復何為逝波不可駐感激成吾詩

張子英閒止齋

鳥飛止茂林魚游止深淵步止辭踰躑語止絕悔愆虬

蚰升高壁朽殼消腥涎夸父逐羲和渴死大道邊所以
知止者不為物所牽擺落塵網嬰寂寞守自然悠悠觀
羣動默默全吾年

閒居安所止自古有陶公柴門蔭高柳左右來清風
籬密復踈下有黃菊馥摘花泛濁醪嘯歌撫孤松馬
耀長衢視之如蒿蓬

築室在城市而無闌闔聲非關遠人世慮滌境自清書
圖堆几案花竹當簷楹釀酒香滿甕賓至即共傾黜陟

吾不知寵辱吾不驚百歲聊復爾孰為身後名

耕雲詩三首為堵無傲作

青山何逶迤白雲自悠悠數畝幸可耕此外更何求
整耨候時雨荷鋤適東疇凱風拂蘭蕙林薄鳴鴈鴒我麥
既萃萃我禾亦油油食力分所安但願歲有秋王租及
時足尊酒聊相酬

八月白露零九月築場圃稻粱已映遂梨棗亦盈塢耕
耘幸就畢一飽諒可取斗酒烹黃雞殷勤會田父但願

守令賢邑里得按堵無事苟安居明朝復相聚

朝耕原上雲暮宿雲間屋雲來動丹霄雲去澄翠麓坐
看雲變化卧見雲起伏斯須不可期飄忽鳥過目濯足
臨寒泉息景蔭嘉木飯蔬勿云惡無憂勝梁肉長歌招
隱詩清風滿空谷

壬辰歲八月自台州之永嘉度蒼嶺

昨暮辭赤城今朝度蒼嶺山峻路屈盤峽束迷晷景豁
豁出風門坎窞入天井冥行九地底高闕羣木頂瀑泉

流其中礮若洩溟津哀猿嘯無外去鳥飛更永僕夫怨
跋涉瘦馬悲項領盜賊逭天誅平人遭灾眚佇立盼嶺
岑心亂難為整

夢草堂遣懷

即事在自得彊歌非正音所以春草句聲價重兼金若
人千載下遺響邈難尋淒涼一池塘賴爾得至今我來
當杪秋天淨潢潦沈枯荷有餘馨衰柳無殘陰鼓鼙響
未已山水意徒深感時念兄弟惻愴傷我心

在永嘉作

高屋集飛雨蕭條生早寒我未復幾時明月缺已團浮
雲蔽青天山川杳漫漫狐狸嘯悲風鯨鯢噴重瀾孤雁
號南飛音聲悽以酸顧瞻望桑梓慷慨起長歎願欲凌
風翔惜哉無羽翰中夜百感生展轉不遑安枯荷響西
池槁葉鳴林端寥寥天宇空冉冉時節闌舉俗愛文身
誰識章甫冠河流未到海平陸皆驚湍旗幟滿山澤嗚
呼行路難

蟾室詩為台州棲霞觀道士作

蟾是蝦蟆精誰令居月宮
淒其羈旅身竟作蝕月蟲
我心有靈丹光與日月同
子能精鍊之可發天地矇
照灼六合外安事一室中
哀哉爬沙輩局促棲樊籠

癸巳正月在杭州作

春陽動萬物衆草皆已抽
嚶鳴亦和悅我何獨懷憂
鯨鯢未殖醢豺狼滿山丘
鳳凰竄荆棘烏鳶自相求
浮雲蔽蒼穹天路阻且修
風沙日暮起鰲羽安所投
悲來怛

中懷泣涕從橫流

江城陰氣凝積雨春淒涼出門何所見但見瓦礫場新
廬各有前店舍亦已張市人半荷戈使客盡戎裝回首
舊遊地慘淡寒烟黃悵焉念所思惻愴心中傷

徘徊西湖上愴恨有所思所思不可見涕淚下沾衣死
生一瞬息逝者安可追狼曠信君子李陵非男兒

礮鐵當用椎析薪當用斧拔蓼而植荼去辛還得苦峨
峨九陽門衛以豹與虎微微螻蟻忱鬱鬱不得吐

登卧龍山寫懷二十八韻

暮春時雨餘原野皆秀色流雲暖芳甸惠風暢輕翼清
吟苦低垂崇岡緬登陟山川糾紛錯疆畎互紆直淒涼
神禹穴偪仄勾踐國王簡閔玄絨銅牛啟雄德霸氣浩
江河王風散荆棘感今情軫鬱懷古心愴惻東溟尚波
濤中原未耕織無能事蕭曹妄意追契稷蹇產魂屢遷
逡遲足猶側良辰復幾何白日忽中昃周流睨方圓俯
仰觀動植有水必趨東無星不供北宗社固神靈至尊

實恭默殷王伐鬼方尚期三年克苗頑負險阻終竟膺
竄殛天戈向無前況乃誅鬼蜮竊聞海濱民決皆疾狂
慝荷父思一奮所懼官未識朝廷鑒往轍中自誅貪悞
主將敦書詩志士願盡力諸公總英俊矯矯百夫特愚
生諒踈拙千慮冀一得農人奉壺漿遲爾殄蝨賊采薇
戒懷歸伐檀慚素食白雲在青天可望不可即浩歌梁
甫吟憂來憑胸臆

立夏日有感

朝旦天宇清逍遙步庭除溫風自遠至綠樹嘉有餘登
高展遐眺萬象各以舒念此客行久感彼時節徂退食
耻尸素進思愧庸駑仰視日月高俯察川原紆願欲凌
風翔周流觀六虛天路修且阻惜無奇眩車倚松翫懸
蘿藉茅想連茹公叔實尚賢寧武不能愚何當脫塵鞅
歸卧園田居

贈柯遂卿一首

并序

今年夏四月余至台聞柯遂卿抗言釋誣囚事甚異而

偉之夫天下之大豈無慷慨激烈之士見義而勇為之者哉其作也非有私其進也非有求觸於其心形於其言發於其言信於其事可不謂之大丈夫哉惜其晦而弗彰也於是乎為之詩曰

雷霆蟄神威妖蜃躍海濱將軍戰敗死玉帳空無人腥涎之所被蛭螾皆蛇鱗天弧不張弦民情曷由申闕縣

亦令典奉行在明仁誰令姦宄徒並緣逞頑嚚俄然齒髮軀化作豺狼身剽金既無畏况復枉平民壯哉柯夫

子義氣衝九旻曳裾公府門抗論回星辰坐令霜雪間
朽骨生陽春睨視夸毗兒精魂散飛塵我忽耳聞之肝
膽張輪囷安得似卿輩落落千百人出應休明時翊贊
臯陶臣旌別鸞與梟再使權衡均上天意茫茫感歎空
悲辛

贈周宗道六十四韻

天弓撥其弦平地躍虎狼腥風扇九澤濁霧干太陽瑣
瑣蚊與蟲亦沸如蜩蟬帝閭隔蓬萊弱水不可航螻蟻

有微忱抑塞無由揚遙遙草茅臣怒切忠憤腸披衣歛
軍門披腹陳否臧曰走居海隅詩書傳世芳感荷帝王
恩祿食厠朝行走身非已軀安得緘其吭走有目擊事
敢布之廟堂永嘉浙名郡有州曰平陽面海負山林實
維甌閩疆閩寇不到甌倚茲為保障官司職防虞當念
懷善良用民作手足愛撫勿害傷所以獲衆心即此是
仍墻奈何縱毒淫反肆其貪攘破廩取菽粟夷垣劫牛
羊朝出繫空橐暮歸荷豐囊丁男跳上山妻女不得將

稍或違所求便以賊見戕負屈無處訴哀號動宮蒼斬
木為戈矛染紅作巾裳鳴鑼撼巖谷聚衆守村鄉官司
大驚怕棄鼓撤旗鎗竄伏草莽間股慄而玄黃窺伺不
見人喘江走倭倭可中得火伴約束歸營場順途劫寡
弱又各夸身彊將吏悉有獻歡喜賜酒觴殺賊不計數
從橫書薦章民情大不甘怨氣結腎腸遂令父子恩化
作蠶與蝗恨不斬官頭剔骨取肉嘗累累野田中拜泣
禱天皇願得賢宰相飛牋奏巖廊先封尚方劔按法誅

女奴賊擇用忠蓋臣俾之提紀綱彎弧落鵠梟雉棘出鳳
凰尚可存牙遺耕稼納官倉失今不早計如水決隄防
而後事堙築勞費何可當走聞疽初生灼艾最為良煖
成施剗割所憂動膏肓邊戎大重寄得人則金湯龔遂
到渤海盜賊還農桑張網入廣陵健兒跪如羊苟能任
仁智勿使儉邪妨孟門雖險艱可使成康莊走非慕爵
賞自鬻求薦揚痛惜休明時消息無其方又不忍鄉里
鞠為狐兔場陳詞未及終涕泣下滂滂旁觀髮上指側

聽心中傷天路阻且修不得羽翼翔可憐涸轍魚待汲
西江長況有蛟與虬磨牙塞川梁旌丘靡與同載馳徒
慨慷嚴冬積玄陰天色慘以涼衆鳥各自飛孤鸞獨傍
徨冥冥雁山雲木葉殷清霜子去慎所過我亦行歸藏

遣懷

鴻鵠會高風拂翼凌雲霓蛟龍不得水葺鱗困塗泥惟
昔望諸君一戰舉彊齊秦穆霸西戎能用百里奚傳說
築商巖太公釣磻溪韓信寄食飲孔明躬耕犁立賢苟

無方曷問驚與驚驅車上太行峻極不可躋重雲蔽層
岑流潦絕荒溪豺狼當我嗥魑魅向我啼顧瞻望九州
欲去惑東西嘉穀委蔓草良田養蒿藜乘黃避跛蹙孤
貉驕虎貔誰言縱壑魚竟為觸藩羝長夜起嘯歎邪氣
憑我臍夢登舜蒼梧遙望禹會稽援琴奏將歸日暮增
慘悽盲飈正滂勃孤鳳將安棲

三月八日偕徐成中楊澄源李子庚吳溥泉董
朝宗黃中立程邦民湯仲謀王文明遊南鎮得

禽字

積雨霽芳甸凱風來遠林逍遙出郊郭徙倚散煩襟桂
棹蕩清漣長裾曳輕陰肆覽夏王陵流觀秦帝岑黃能
安所之荒楚自蕭森仰翫卉木榮俯聆泉石音洋洋潭
底魚喈喈枝上禽昭融見天德澠濔怡人心況有文房
友溫恭比瑤琳獻酬禮不愆詠歌思彌深良辰豈易得
嘉會難屢尋顧作膠與漆無為商與參殷勤屬此章冀
以代兼金

送馬生遊京師

東山夜雨急鑑湖春水深之子遠于邁祖帳清江潯白
日映蘭皋青烟起松岑豔舞激回風長歌裊哀音何以
慰離懷八珍盈釜鬻何以將素情贈言比瑤琳京畿佳
麗地多士紛如林構厦僊檀栢去疾須苓參殷勤治安
策悃欵大寶箴敷陳草茅情啟迪帝王心斯人邈永矣
繼之在於今忽羨蘇季子自侈多黃金

別峯和尚方丈題唐子華山陰圖

連山走陂陀，太谷入晻曖。屋藏深樹中，路出巨石背。烟
雨時有無，澗谷互顯晦。輕盈曳飛綃，縹緲沃浮黛。雄梁
矯修甍，駢壁駮文璫。崢嶸紫霞高，屈曲白水匯。陰森神
鬼宅，奮迅龍馬隊。風雲氣象寬，日月光烟碎。借問此何
鄉，或有捐余佩。荅云越山陰，信美無與對。自從永和來，
燕遊推勝槩。佳人去不還，盛集嗟未再。唐今實好奇，掇
拾歸畫繪。上人遠公徒，我亦淵明輩。會晤屬時艱，觀覽
增感慨。故園沒灌莽，舉足蛇豕礙。放歌自太息，激烈驚

厚載

送孔世川赴江西儒學提舉

鏡湖荷花發耶溪菱葉生
送君何所之去作西江行
西江大藩地卓犖多豪英文
能絢雲漢武能壯干城浩蕩
吳楚間頽波障東傾鳳凰不
妄集梧桐匪空榮行行勿
憚遠疊疊崇令名

我辭西江歸倏忽十二秋
每望西江雲思心悵悠悠恨
無排風翼安能凌虛遊故人
渺天末可夢不可求邂逅

送子行感我涕泗流登山有修蛇涉水有長虬逝者如
零雨一落誰能收

為竺西和尚題谿山茅屋圖

青山十畝餘茅屋數間足高樹結浮烟脩篁茂深綠孤
松無鄰舍生理不拘束開田種禾稻間以黍與粟中歲
幸西成青黃被谿田鳬鷺與鴻雁亦各得所欲清秋霽
涼雨澗底石如玉野老時見過杯酒聊與屬但願官長
廩吏卒莫我毒耕稼納王租世世還相續

春谷詩為竺西和尚賦

條風自東來雪消春谷暖
荒畦碧草短清池細泉緩
雜花明錦繡時禽響絃
梵道人閒無事習慣牛頭
嬾過橋
禪杖落坐石袈裟袒日暮
精舍歸燈龕白雲滿

四月二十二日郊外游得水字

草根螻蛄鳴湖上蒹葭靡
繁林溺深綠清池散圓紫
離居昧節序陶情賴佳士
泛舟出郊甸緩步信所履
壺觴展倡酬及此晴日美
嘯歌望山川慷慨集悲喜
豺狼未

鼎鑊郊野尚多壘鐵衣掛儒冠好爵逮麻屨吾儕幸味
苦得似道傍李無思身外憂適意聊復爾歸雲入禹穴
返照射宛委烏啼樹有風帆過煙生水興盡各言還月
明城角起

題枯木圖

松以直而伐桂以芳而攻矜此屈曲形擁腫又空中身
為螻蛄家根作蟻蛄宮蠹皮化土壤朽腐不可烘輪囷
盤石間幾歲經霜風明堂構羣材梯梁匪硿礧斧斤獨

不到凋落還芄芄知兵牘孫子善射殲有窮胥種伏短
劍韓彭歎良弓豈如蚩蚩氓負薪翳蒿蓬飢食渴則飲
不識王與公白髮死枕席無事傷其躬贈詩持畫還去
尋黃綺翁

五月三日會王氏南樓得激字

蹇步屬時艱睽違若多感偶寄越城隅頗喜得幽寂炎
夏天象明羣山皎如滌況有文獻友同心不離邈雖無
鼎俎盛斗酒聊相覓登樓望禹穴慷慨生感激玄珠淪

赤水金簡不可覲崩騰六合內慘淡多羽檄天弧弛虛
殼封豕逃碁戚誰見野田中白骨雜瓦礫憂來歌一曲
客淚再三滴晚風吹晴霞海色映石壁展詩肆遐眺嚴
令困勅敵諸公俱鳳麟愧我獨樗櫟危途知驥驥勉旃
樹功績無然學兒女愴恨山陽笛

題西旅獻獒圖

鳴鳳啟至德鎬京作王家萬國戴元后懷柔無邇遐
奚裔夷人占風慕中華毳服耳金鑣拳毛眼窈窕獻獒

越重譯辛苦涉流沙歸仁自彼心務廣匪予夸寥寥大
廷臣忠告猶咨嗟卜年盈八百分得未為奢云何叔世
主黷武生諠譁枸醬毒南徼河源訖西槎哀哀萬夫命
驅以易驪騮暴蔑文祖訓大貽天下瑕畫圖漫寫形索
意良無涯太康焚雉頭官闈茁妖芽開元灰組繡驪岫
荒淫哇夫豈不有初蕩心生百邪望美洛陽都赤符炳
流霞玉闕閉高門軍賔絕相加鳩杖老貌貅虎落藹葉
麻煌煌中興業奕奕流芳葩謙光信受益知足復何差

感事重懷古因書戒矜誇

題錢舜舉折枝山茶

歲暮寒氣結百卉無遺榮
懿此獨不凋方冬燦紅英
有似節義士特立不爽貞
幽居屏紛雜丹鉛寄深情
葱龍翠雲翹綴以流霞精
玄霜避晨豔華月助宵明
坐令桃與李無言愧微生
贈詩勿遐棄貴之比瑤瓊

遣興六首

避地適他鄉息肩謝羈束
生事未有涯暫止聊自足
南

園實清曠可以永幽獨層樓面羣山俯見湖水綠雜英
被郊甸魚鳥得棲宿登臨且慰意未暇計遠躅聖賢有
遺訓知命夫何卜

積雨兼數旬天氣涼有餘青苔交戶庭始覺人跡踈地
主多閒園可以種我蔬兒童四五人蔓草相與鋤既倦
則歸休卧閱牀上書無事且為樂何者為名譽

夏日苦太長夜景良可愛華月吐層岑遙天碧如黛披
衣更登樓稽山正相對澄湖晶空明浮雲去無礙遺榮

世何人賀老今不在涼風吹毛髮坐久增感慨

溽暑百體倦曉涼正堪眠飛蚊何營營繞鬚鳴相煎拍
之不勝多揮去還復前世亂有骨肉逃生幸完全細微
何足較此意誰當傳

綠樹何陰陰良苗亦離離開窓招遠風赤鯉躍清池雲
日釀晴光芰荷有餘姿宴坐偶自得悠然遂忘飢富貴
不可求守分勿復疑

迂踈乏世用矯情非所安投簪謝時輩聊得心中寬回

首望故鄉枳棘日以繁譬彼水上萍隨流且盤桓樓頭
好山色晴雨皆可觀未知明朝事且盡今日歡

久雨壞牆園蔬盡壓悵然成詩

晚歲逼豺狼漂搖去鄉土囊橐罄留儲釜甑恒若窳開
畦種蔬菜撥借荷地主晨興率童稚樹藝躬偃僂瓠實
正纍離茄花亦爭吐魚肉方絕交恃此當醢脯悲風吹
江干浩蕩十日雨幽泉湧陰竇高墉圻修堵蒼蔓壓泥
沙朱苞埋宿莽淒涼紫芝英乃與朝菌腐數奇值時危

一飽不敢取天地有窮愁每望貧家聚青苔滿頽墻日暮空倚柱

題鮮于伯機書杜工部詩後

少陵昔避亂買屋西枝村卜鄰得贊公聊可與晤言四
圓鬪豺虎煙塵塞乾坤中宵望北辰慘戚衰老魂我今
亦漂泊不得歸本根感此一太息欲語聲復吞

次韻和脫因宗道感興三首

索居守貞素久已忘世機晨興夕還寐不知時節違庭

前有芳樹宿昔容顏非巢鳥去安之寒蟬鳴亦稀居人
歌北風客子歎無衣浮雲結陰翳白日少光輝鴻雁號
南翔蟋蟀在中閨榮華如流水一往何當歸

松柏守孤直不爭桃李色明星在青天有時化為石春
風車馬塵竟日翳紫陌寧知禾黍地舊是王侯宅蓬萊
有仙藥求之不可得霜風吹林木歲暮徒愴惻

鉛刀方用世掛壁干將閒剪松養荆棘匠石空悲酸驅
車陟太行日暮多險艱玄冰膠大谷脫粟貴琅玕魑魅

攬人魂豺狼食人肝路遠無羽翼何由得飛還

題春江送別圖

春江水悠悠行人上蘭舟春雲散江樹行人重回顧嘉
會未有期離心渺千里願作還山雲莫作東流水

琴清堂詩

亭亭嶧陽桐斲為綠綺琴絙之朱絲絃彈我白雪音虛
堂夜迢迢華月耿踈林鳳凰天上来虬龍水中吟曲罷
起太息無人知此心

田家

田家無所求所求在衣食丈夫事耕稼婦女攻紡績侵
晨荷鋤出暮夜不遑息飽暖匪天降賴爾筋與力租稅
所從來官府宜愛惜如何恣刻剝滲漉盡涓滴怪當休
明時狼籍多盜賊豈無仁義子可以弭鋒鏑安得廉循
吏與國共欣懌清心罷苞苴養民瘼國脉

渡江遣懷

東風吹滄江白日照花柳山川半顯晦積雨晴未久青

陽好氣候羣物競苞剖農夫荷鋤犂各自登隴畝鳴鳩
鳴相應陂水光瀏瀏天地起戈兵荆榛塞原阜茲邦特
按堵庶足憩奔走故鄉有園田委棄沒藜莠老母年八
十頭童齒牙朽癡兒始垂髫出入寡朋友衣衾雜絮毳
羹食乏菰菲儼然多病身全家倚餬口那令更遠去憂
念成疾首千金聘宿瘤顧謂西施醜鹽車摧太行驂騑
不如狗況我驚蹇質困踣畏培塿濟河須巨舫將焉用
嬰缶朱絃絙琴瑟曷中洪鐘紐剡蒿射屏革空貽養由

咎巍巍神祖烈乾坤讓高厚蠢茲蛇豕儔乘間恣嗜吼
非無熊羆臣土產分左右更張吾豈能習慣彼已狙鹿
麋曾傷虎宵邁龍狸瓜寤言亂心緒忽若醉醇酒踈賤
等蚍蜉捐軀復何有夷吾匪每生鞠育未宜負愴恨憶
松楸淚濕蓬鬢垢道途正艱阻進退維宐白向風一陳
情何由達南斗

題山水圖

江上何所有高低千萬峯結廬覆以茅取足聊自容綠

樹既翦鬱清溪亦溶溶地僻無車馬猿鳥得相從日落
沙際明寒煙澹踈松蒼茫雲霞外隱見青芙蓉悠然一
舸還好景時獨逢歸來山月出古剎鳴昏鐘

若耶溪杳郭深居精舍

上人好山居入山惟恐淺紆餘涉淵沚結構依巖嶂岡
巒外挺拔水木終隱顯其前對鵝鼻突兀正冠冕其傍
聳木永積翠森偃蹇後有獅子巖嵒翠露巖巖春花炫
芳林秋草馥陰暎高通雲雨過側見星斗轉桃源不遠

求箕穎安足踐我來三伏涼羈懷忽如展談經道心融
說法俗慮翦疎窓夜深啟孤月掛遙峴空濛白毫光閃
鏘動崖巘何當此卜隣永用辭澠酒

大熱遣懷

盛夏火用事長日不可堪熱汗發我膚如泉溢穹嶠清
晨登樓望四野皆紅嵐坡坨會稽山縹緲浮鬱藍何由
作雨澤一洗唱與酣須臾玻瓈盤湧出琉璃潭雜氣若
絳旂飄飄散空嶺朱光焚九幽天色煬以醅樹木首咸

俯鳥獸聲盡鰭玄冥將禺疆側身入壑龕淵蛇葺短鱗
山龜灼枯臙悍熊伏朝鼯困龍縮秋蠹焦根裂埴斷斃
鵲蚌脯含水井為湯池治容成病領渡水翅帖帖守門
口舐舐蜩蟾輕綃翼依陰萃楓枿沸渭泊靜寂噪聒亂
語談蒼蠅丹砂頭羣飛逐烹脂拍之適汙手驅之死仍
眈對食憚下脰引飲輒傾甌撫几炎欲燎披衣重猶函
慨彼征戍卒荷戟忘寢寢棄絕骨肉愛不得同苦甘但
聞盜賊熾未見工師戡郊原擄掠遍餽餉那能覃況乃

隆暑節蒸鬱非所諳用兵貴拙速將帥當懷慙沈冥及
暮鼓兩目眊流泔拂袖招遠風衆星爛天南河漢上昭
回烟霞遠鬢鬢且喜辰極明願覩戎馬俊雲門連鏡湖
林壑清且涵豈惟隔埃壘庶足憩負擔惜無五畝宅偃
蹇投吾簪

六月十八日自天章入城作

天淨山氣涼溪渾夜來雨籃輿度踈翠初日照平楚高
林半長烟好鳥時自語煩襟得蕭散似欲忘羈旅何當

盜賊息比屋豐禾黍逍遙丘壑間鹿麋以為伍

晚同方舟上人登師子巖作

落日下前峯輕烟生遠林雲霞媚餘姿松柏澹清陰振
策縱幽步披榛陟層岑槿花籬上明莎雞草間吟涼風
自西來颭颭吹我襟榮華能幾時搖落方自今逝川無
停波急絃有哀音顧瞻望四方悵焉愁思深

七月四日自深谷之靈峯作

平旦出雲門亭午至靈峯山盤澗縈紆谷深巖錯重竹

露滴皎皎林霞散溶溶度石苔蘚滑披蘿烟霞濃頗喜
禾黍成可以慰老農野草各有花照水似銜客徐行恐
觸熱聊憩崖下松時聞幽鳥鳴亦足開心胸慨懷陶隱
居丹竈今無蹤干將與莫邪俱已化為龍空餘遠山色
茁茁青芙蓉

清修院良上人浸月軒

華池浸皓月高下共清瑩炯如長明燈飛入大圓鏡又
疑鉛汞爐伏火發宵映曾軒開九秋萬象出昏暝月來

池色動月去池色定窺臨足遊適翫味見心性珍重無
生侶於焉託清淨宴坐六塵空百魔從律令

普濟寺用恭行已上人韻

偶從靈峯來遂作雙峯遊雙峯何峨峨俯映耶溪流炎
天正埃鬱欲往安所投喜見農事成秔稻滿中丘步入
古寺門信美無與儔渌池對徑路水木自深幽飛蘿冒
松柏上有猿與猴登樓散煩熱坐挹山綢繆更愛山下
泉泠泠洩陰溝青苔闕修竹竟日涼風留披軒眺西崖

煥若丹霞浮神劍去安之起望空斗牛沉思終永夜月
白銀潢秋

題陸放翁晚興詩後

雄劍閼寶匣中夜蛟龍吼男兒抱志氣寧肯甘衰朽松
栢在深谷枝葉拂星斗雖無般匠顧勢自凌培塿昂昂
商山翁矯矯渭濱叟林泉不遐遺軒冕亦固有奈何劉
伶輩賤身若芻狗徒生天地間辜負髮與手三復詠斯
章千載吾尚友

題商學士寒林圖

昔聞商學士水墨稱絕藝今觀寒林圖信美無與儔
凍霰雪餘斂掃悉輕脆玄水刮老骨衣被荷纖荔龍鬚
結瓔珞虎爪出鋒銳鱗皴蝮蛇殼璀璨錯琅玕蒂下有不
死石藍汁沃鬢髻前有赴海湍漱濯沙土細青烟曼遙
渚白日淡荒裔蒼茫浮雲外縹緲惑盼睭梧桐早飄落
鳳鳥將焉逝四序若循環歲時在描翳哀榮各有時至
道惟冥契

題雜畫卷子

山川出雲霓谿谷藏虎豹枯樹繒綾身怪石硯疊貌竹
枝如琅玕烟雨昏幕罩梅花雪中開的礫珠磊砢蘭獨
稱國香娉麗最可樂萸纖草堪藉傷覃棘能拈宋公學
元暉駭獸見騰咆老班性嗜酒藻思發餘醅丹丘泣龍
髯零落江湖擢顛王食敗筆得米動盈窖僧明本靜者
一藝起衆鬧展卷見歷歷聊足解喧囂裁詩慕韓豪瑣
細非所較

題宋子章效米元暉山水圖

昔時米南宮父子同畫癖油然煙雨態千里入盈尺近
代宋尚書筆意妙欲逼置之几格間新舊莫辨識應是
前後身神會造化迹鴻濛迷日月瀕洞飛霹靂蒼崖晦
中斷天闕杳高隔洪濤漲無倪龍虎移窟宅農夫怨昏
墊樵牧絕行跡破屋兩三家搖撼已傾側得非杜少陵
無乃陶彭澤簷茅委泥濘籬菊沒狼籍空江乏舟楫汗
漫安所適披圖瞻青冥惆悵至終夕

為賈性之賦松石

老松不構厦潜跡歸后土千年化為石詭怪驚地府
都壯輪奐翦截就梁柱嶙峋鋸鑿餘棄置人得取君家
赤玻璃光采奪朝暉嶒嶸鐵心堅璀璨霞色古何當呼
吳罌匠以修月斧持獻女媧皇天罇或可補

有客來款我

有客來款我自謂儒者儔問我胡不除乃來此淹留我
笑而不答彼問方未休彼我異所志問答寧相投青山

屋外高溝水山下流隱几書一卷寒簷雀啾啾

題趙文敏公畫松

吳興昔王孫能畫世莫及觀其二松圖矯若龍出蟄蟠
根破坤輿拔萃滄原隰膠加各軒翥崩劣相倚立鼉鱗
撐空青鬣振颯颯高歲日月氣清滴雲霧汁垂釣者
何人短棹非妄集五湖多風濤蛟蜃頭角解不如滂澤
間取足鱗與鰓倦眠松影下百竅清涼入慎勿驚松枝
天寒衣袂濕

題三香圖

梅是玉堂花和羹有佳實水仙如淑女婉婉抱貞質山
礬直而勁野處似隱逸分類族雖三論德性乃一瓊臺
耿清夜涼月白勝日霏霏芳氣交粲粲華采溢琪樹讓
晶瑩瑤草愧私暱願言永其歡歲莫保終吉

感時述事十首

天王有萬國撫治不能徧百僚分所司控制倚方面旬
宣貴浹洽付託屬隆眷易置苟無恒勤怠朝夕變自非

穀氏儔何官匪郵傳矧茲世多故軍府希閒宴戎機一
以失蟻穴債臺殿公庭委舊事書牘呈新選來者且遲
遲在者同秋燕偷安待日至退託從私便姦貪遂乘隙
民病孰與喻大臣國柱石憂喜相連纏反躬既遺闕何
以率州縣寄與要津人有古未宜嚙

十羊煩九牧自古貽笑嗤任賢苟不貳焉用多人為師
行仰供給州縣方告疲差徭逮所歷添官有權宜奈何
乘此勢爭先植其私百司並效尤貨賄從橫飛列坐隘

公堂號令紛披離名稱到輿隸混雜無尊卑正官反差
出道路不停馳狗祿積日月官吏之所希此輩欲何求
股剥圖身肥世皇一宇宙四海均惠慈盜賊乘間發咎
實由官司云胡未悔禍救焚用膏脂姻婭遂連茹公介
棄草茨農郊日增壘良民死無期天關深虎豹欲語當
因誰

先王制民產曷分兵與農三時事耕稼閱武在嚴冬亂
畧齊憤疾戰伐厥有庸那令異編籍自使殊心胸坐食

不知恩怙勢含威克將官用世襲生長值時雍豈惟昧
韜畧且不習擊剋悍卒等驕子有令亦無從跳踉恣豪
橫鼓氣陵愚蠢所以喪紀律安能當賊鋒崩騰去部曲
蟻合尋歸蹤時方務姑息枉法稱寬容寧知養豺虎反
噬中自鍾國家立制度恃此為垣墉積弊有根源終成
腸肺靡何由復古道一視均堯封

秦狗不噬禦星馳募民兵兵盡烏合何以壯干城百
姓雖云庶教養素無行譬彼原上草自死還自生安知

狗大義捐命為父兄利財求應召早懷逃竄情出門即
剽掠所過沸如羹總戎無節制顛倒迷章程威權付便
嬖賞罰昧公平飢寒莫與恤銑挫怨乃萌見賊不須多
奔潰土瓦傾旌旗委曲野鳥雀噪空營將軍與左右相
顧目但瞠此事已習慣智巧莫能爭廟堂忽遠算胸次
猜疑并豈乏計策士用之非至誠德威兩不立何以御
羣氓慷慨思古人惻愴淚沾纓

古人有戰伐誅暴以安民今人尚殺戮無問豺與麟濫

官舞國法致亂有其因何為昧自反一體含怒瞋斬艾
若草芥擄掠無涯津況乃多橫斂殃禍動輒臻人情各
畏死誰能坐捐身所以生念慮嘯聚依荆榛暴寡憚強
梁官政惟因循將帥各有心邈若越與秦遷延相顧望
退託文移頻坐食挫戎機養虺交蛇鱗遂令耕桑子盡
化為頑嚚大權付非類重以貽笑彈鼠璞方取貴和璧
非所珍但恐胥及溺是用懷悲辛

五谿舊三苗蛇虺相雜處其人近禽獸巢穴依險阻起

居任情欲鬪狼競爪距況乃識君臣且不顧子父所以
稱為凶分北勞舜禹先朝慎羈縻罔俾來中土胡為倏
而至馳驟如風雨見賊但超超逢民輒俘擄腰纏皆金
銀衣被俱繡組所過惡少年改服投其伍農家劫掠盡
何人種禾黍盜賊有根源厥咎由官府任將匪能賢敗
衄乃自取奇材何代無推誠即心膂誰哉倡此計延寇
入堂宇割鼻救眼睛於身竟奚補浙西耕桑地百載安
生聚自從甲兵興徵斂空軸杼疲氓真可憐忍令餉豺

虎追憶至元年憂來傷肺腑

虞刑論小故夏誓殄渠魁好生雖大德縱惡非聖裁官
吏逞貪婪樹怨結禍胎法當究其源剪鋤去根荂蒙龍
曲全宥駕患於後來濫觴不堙塞滔天谷陵頽總戎用
高官沐猴戴母顛玉帳飲酒肉士卒食菜羹未戰已離
心望風遂崩摧招安乃倡議和者聲如雷天高豹關遠
日月照不該俱曰賊有神討之則蒙災大臣恐及已相
視若銜枚阿諛就姑息華紱被死灰姦穴爭效尤無風

自揚埃嘯聚逞強力謂是爵祿媒黎民亦何辜骨肉散
草萊傾家事守禦反以結嫌猜慟哭浮雲黑悲風為徘徊
赤子母不憐不如絕其胚養梟逐鳳凰此事天所哀
胡為尚靡定顛倒勝與頽春秋戒肆眚念此良悠哉
八政首食貨錢幣通有無國朝幣用楮流行比金珠至
今垂百年轉布彌寰區此物豈足貴實由威令敷廟堂
喜新政躁議違老夫悠悠祖宗訓變之在朝晡瞿然駭
羣目疑怪仍揶揄至寶惟艱得韞櫝斯藏諸假今多若

土賤棄復誰沽錢幣相比較好醜天然殊譬彼締與綌
長短價相如互市從所取孰肯要其獮此理實易解無
用論智愚矧茲四海內五載橫戈爰赤子投枳棘不知
所歸途一口當萬喙唇縮舌亦瘡導水必尋源源達流
乃䟽藝木必培根根固葉不枯慎勿庸邇言揚火自焚
軀尚克詰戎兵丕顯厥祖謨

惟民食為命王政之所先海虀實天物厥利何可專貪
臣務聚財張羅密於壇厲禁及魚鰕鹵水不得煎出門

即陷阱舉足遭纏牽息休用鞭箠冤痛聲相連高牙開
怨府積貨重姦權分攤筭戶口滲漉盡微涓官征勢既
迫私販理則然遂令無賴兒睚眦操戈鋌出沒山谷裏
陸梁江海邊橫行荷簞籠方駕列船舡拒捕斥後懦爭
彊夸直前盜賊由此起狼藉成蔓延先王務廣德如川
出深淵外本而內末民俗隨之遷自從甲兵興奄忽五
六年借籌計得喪耗費倍萬千回憶至元初禁網疎且
平家家有衣食畏刑思保全後來法轉細百體皆拘攣

厚利入私家官府任其愆大哉乃祖訓典章尚流傳有
舉斯可復庶用康迺遭

秦皇縣九宇三代法乃變漢祖都咸陽一統制荒甸
豪雄既鏹削瘡痍獲休宴文皇繼鴻業垂拱未央殿累
歲減田租頻年賜鰥絹太倉積陳紅圉府朽貫線是時
江南粟未盡輸赤縣方今貢賦區兩際日月竊胡為倚
東吳轉餉給豐饒徑危冒不測勢與蛟龍戰遂令鯨與
鯢掉尾乘利便扼吭要國寵金紫被下賤忠良怒切齒

姦穴競攀援包羞屈政典尾大不可轉聖人別九州田
賦揚為殿中原一何膺所務非所先豳風重稼穡王業
丘山奠夫征厲末習孰敢事游燕哀哉罔稽古生齒徒
蕃羨一耕而十食何以奉征繕長歌寄愁思涕淚如流
霰

漁樵問答

樵問漁江湖風波惡何似采薪人無憂如藜藿
漁問樵山中何所有未若擢扁舟得魚即沽酒

丙申二月別紹興諸公

勞生屬時艱將老萃憂感風塵隘九野何土為樂國茲
邦控吳越名勝聞自昔湖山競奇麗物產亦充斥交游
尚質儉而不事華飾況有良友朋時來慰岑寂全家免
寒餓幾欲忘旅客胡為復舍此僂俛就行役軒車遠追
送酒至淚輒滴還鄉人所樂我獨愁苦劇故山有松栢
摧折為荆棘豈無骨肉親大半生死隔此語不可聞此
景那堪覲愁情如波濤頌洞胸與臆佇立向穹蒼一歎

雙髻白

雨中雜詩四首

久晴思得雨既雨久復厭
廣庭屯陰氣平陸就昏墊
淒風吹人寒朱火黯無燄
水衣上高墉泉溜發枯塹
青泥沒達道寸步不可覘
慷慨成感傷纏綿積憂念

首夏涼風生朝樹結晚色
濛濛細雨交慘慘原野黑
衡門長藜莠壤壁穿荆棘
念彼征戍兒沾濕荷戈戟
囊橐罄留皆藿菽難充食
供輸既乏絕戰鬪何時息
巢居者

誰子鼠竄延晷刻田疇沒蓬蒿無處勤爾力旻天高寥
寥仰視不可極

多雨損萬物草爛麥生耳青苔獨得時延曼及堂祀晨
興視天宇滴瀝殊未已君子懼陸沉小人憂餓死淒涼
大將營鼓縵弧弓弛朝廷竟知否盜賊如流水

離居感時節寤寐不遑安青燈晦壁角簷溜如崩湍屈
指計日月殷憂集多端蛙黷爾何知叫噪喧草莞中夜
攬衾裯淒淒陰氣寒鳳凰鍛羽翼卑飛避鵙鷺撫几一

長歎聲出心已酸

次胡元望郊行詩韻

誰言公館清晨氣晚未散豈乏樹
蕊草尚有花爛漫美人隔巷陌可
念不可喚溫溫夜光璧幽草潜璀璨
鄙夫競喧譁達士善大觀世情如秋
蓮零落風中瓣少年喜紛紜談笑輕
絳灌進取務出奇周慮非習慣逝水
難重迴芳時愁坐換元臣鎮方面邊
戎仰成筭應憐四郊外荆棘滿耕畔
悽悽憂葵女惻惻撫牀瓘興懷增感
傷展

轉過夜半起行視青天星河色凌亂安能作野馬脫畧
謝羈絆

夏中病瘧戲作呈石末公

晚浴烝骨毛蹭蹬張萬孔不虞小人風堀堞觸瘁塤長
驅毒暑氣熖若燎發炮鑽膚入經絡鍵鑰若衝桶蚩蚩
水帝子鼠伏伺腥膈癡踞與狡獪並出助推捫天君赫
斯怒六軍躬自董丹元將與靈逆擊闕哮噴主客相批
亢乾坤為搖動初交且走走再接遂咏咏脩脩蝨股切

臧臧鵬翅翬蕭颼葉鳴颼輶車轉輟驚沙走憲宰落
雪旋蟻蠓凌競剝牀辨敲琢搖佩琤玄水結太陰河海
溢銀汞俄然一陽復日脚舒暉曠微微細泉湧拂拂輕
煙燭柔枝披婀娜弱葉散萋萋燿如九烏燄熾烈昧窺
腴炎炎祝融火煥灼煥龍從龍奔歸大漠虎逐蜚空寵
赫煖熟金石閃爍敵蟬螭肆伐殄囂囂止齊安懞懞岑
頭釋戴壓雨汗渙流瀟黑艷羣醜醜黃庭百神總頗怪
天地氣去來何倥傯集如蟻赴羶散若蜂辭桶棄置且

勿思宵鼓聽謹謹

秋夜感懷東石末公申之

不寐知夜長起視天宇闊散漫草上風朦朧雲間月寒
禽鳴踈樹黃葉墮階闔俯仰觀羣物惆悵不敢發誰云
螻螳壤能使泰山飢蒼鷹鍛六翮狡兔營三窟何當威
弧正王旅得肆伐箇籥雖微材尚可施羽箭豈意風浪
舟心猶隔胡越士生非金玉有足難自達周發不恤緯
楚放常懷闕平生葵藿情忍與霜露歇玄冰膠坤軸非

君孰能幹申章匪繁辭悲憤不可遏

次韻和石末公用元望韻遣興見寄

鵲鳩勸春耕桴鼓帖宵邏拊循餘暇日珠玉生咳唾時
維青陽初天子在左个布德順水今萬國罔不和祿食
自紛紜撫字誰最課幅員若金甌絲髮無豐破涓溜可
摧山機禍不在大中夜登高樓遙瞻太微座乾坤漭寥
落日月飛鳥過憤惋空有心盛時嗟已蹉

以野狸餉石末公因侑以詩

野狽性狡猾夜動晝則潛繫之籠檻中耳弭口不哺當
其得意時足爪長且銛跳踉逞俊捷攫噬靡有饜貧家
養一雞冀用易米鹽爾黠弗自食尋聲竊窺覘破柵舐
肉血淋漓汗毛髯老幼起頓足心如刺刀鏹東鄰借釜
蹄西鄰呼獬獫繫餌翳叢灌設伏抽陰鈐彼機歟已發
此欲方未斂絲繩急纏繞四體如繭黏野人大喜慰不
敢私烹燂持來請科斷數罪施剗剗剗七
燕切使君鎮方面
殘賊職所殲械送致麾下束縛仍加箝腥膏忝污鉞羶

醬或可醃芼芳和糟醬順賜警不廉黃雀利螳螂碎首
泥塗霜烏鴉殉腐肉噴墨身受淹此物亦足戒申章匪
虛誦

和石末公種棘用胡元望韻

力役困年侵種棘代遮邏豫防苟無失有地孰敢唾風
條曲抽乙雨葉細垂个是時春載陽土脉如膏和分疆
督藝植勤惰各有課揮鋤綠烟披轉石蒼蘚破稍看萌
蘖長漸覩根株大結蔭冒長堤開花映高座猿公不敢

窺貉子那得過慨慕陶公言罔俾分陰蹉

得令字

勾芒發陳根北斗轉東柄衆星各參差威弧何時正好
生雖聖心明刑亦王政哲人慎謀始斯焉獲終慶徒言
兩階舞可以懷逆命不見三危山萬里竄梟獍世德異
唐虞民情好爭競那無跼扁醫面有膏盲病波濤地軸
軌虎豹天關負雨露當春滋風霜及秋勁誰能奉明主
順天行號令

正月廿三日得台州黃元徽書有感三首

世亂網恢恢斯人亦淪翳數竒當何如窮途難為計盲
風振喬木碩果失其蒂虎豹落機檻坐服輿皂制玄珠
迷罔象白日慘陰暄涉水水有蛟入山山有彘棄馬感
須無直道懷柳惠青冥無羽翼悲來夜迢遞

結交無疏戚艱難見平生金石苟不渝萬里如兩楹重
山非云遠邈若遼與荆嬾婉豈不懷蛇虺正驕獍手持
故人書心念故人情開書問故人淚下如雨傾

客從何鄉來遺我尺素書道路險且艱故人情有餘妖
氣晦斗極黃濁混龍魚何莖不為藹何麟不為軀殷勤
故人心炯若明月珠投之千丈泥萬古光不渝安得致
閭闔以照君王車

次韻和石末公春雨見寄

愁陰沴陽景孟春猶苦寒騰雲湧巖岫落雪蔽江干街
衢溢黃潦井谷生狂瀾誤疑蛙黽窟中有蛟龍蟠復憂
扶桑日坐為黃濁漫顧瞻望四郊側足不遑安却秦慕

魯連存齊想田單玄髮雖向改壯心終靡殫小人務苟
且君子慚素餐高牙對多壘肉食徒王官周網雖云弛
一匡賴齊桓莫驚溝澮盈雨息當自乾

次韻和石末公春日感懷

下澤潢潦集幽林光景遲羈禽有哀響槁葉無半姿梁
綈不同畝世事久當遺便欲駕扁舟泛彼湖上漪慨懷
祈招賦愴惻感遐思流水逐飄風去若六馬馳干戈尚
雜還舉目多可悲步登西城樓還望東城隄近悼春陵

吟遠傷鴻雁詩未能已怨怒矧暇防笑嗤賴有賢大夫
直道人不欺相期各努力共濟艱難時

紫虛周道士還俗多年而貧老如故元帥石末
公憐其無依復令歸觀就養

白鶴棲青松願與人世違松高風露寒却向人間飛江
湖無稻粱歲莫將疇依稀首浮丘公涕淚灑毛衣浮丘
憐老鶴解悟既往非浴以丹池泉照以若水暉脩然骨
髓清還向青松歸松葉烟茸茸松華霧菲菲可棲復可

食其樂天下稀如何從雁鷺喋呷圖身肥

偶興

勞人怨長途壯士悲老別那將望鄉心對此傷神月
淒涼寒風至惆悵芳草歇瑤琴無子期絲絃為君絕

雜感

畸窮傷往事晚莫悔前非流光不相待逝川那可追
佳期隔河漢日夕千里思鴻雁西北來安能從之飛
佇立望明月天霜夜沾衣

黃慎之自閩見訪夜坐對酌悵然有感

故人一為別七見秋夕月今日見故人故人鬚髮新世
情如鬚髮故人當識察車輪東北馳車轂終不移


倦暑伏管蒯白汗如流瀉開門見故人謂是天上下新
人各自媚故人何為者斧斤入山林松柏化灰燧寄語
風胡子莫怪金躍冶

煌煌華燭輝扇扇飛蛾翼羲和倚扶桑恨無夸父力大
鵬雖有能萬里亦一息可憐千斤牛坐受鼯鼠食

故人髮猶黑故人心尚赤人生一世間幾見駒過隙南
山有喬松翠鵲鬬顏色般倅不收錄野火恣焚炙枝枯
榦亦折雪霰交洒浙中心有流液入地化為石遺之五
百年猶堪補青天

鄭同夫餞別圖詩

江上潮始白林端霞半紫微風颺歸帆紅葉映行子芳
醪恥金樽清歌猶在耳馬鳴不見人愁來若流水



誠意伯文集卷三

欽定四庫全書

集部

誠意伯文集卷四

詳校官庶吉士臣范逢恩

中書臣劉源溥覆勘

總校官編修臣王燕緒

校對官編修臣秦泉

謄錄監生臣秦鴻甲

欽定四庫全書

誠意伯文集卷四

覆瓿集四

古詩

為祝彥中題山水圖

高軒玲瓏不受暑半幅輕綃宿烟雨白屋素壁生空明
似聞水聲繞庭宇松髯拂天藤蔓垂枯根瘦石相因依

明
劉基
撰

寒濤不驚虎兕卧嵐翠欲與蛟虬飛空江悠悠一漁艇
渚白沙明萬魚靜武陵桃花何處尋落日微風片帆影

寄江西黃伯善兄弟

我思美人乃在洞庭之陽彭蠡之陰衝波亘天三百里
離恨比之應更深揚瀾咆哮左蠡怒白日慘慘玄猿吟
欲往從之憤余心鼉鼉鼉不可以駕風撻撻兮雨淫
淫望厭原之飛烟邈匡廬之高岑霞標日觀矗南斗石
門雙闕撐嵌嵌虹旌兮翠羽昌容兮鳳凰舞收衣兮蒞

襟玉笙吹兮紫鸞音望不見兮悲莫任江水湛湛愁楓
林西來文曾到海願寄筆札逾兼金

題安仁余氏留餘堂

君不見石季倫對案方丈皆八珍珊瑚夜光視如土寧
知汨沒同埃塵又不見李贇皇平生鼎食滿萬羊中厨
烟火宵未冷詔書趣使趨南荒金谷名園委蔓草平泉
荆棘無人掃榮華瞬息可奈何空令過者傷懷抱世人
積金貽子孫一朝金盡難復論古來天道有好還君看

漢代于公門

送胡季瑊平江監倉

君不見棠谿沙中金又不見龍門山上桐衝波蕩汨入
坎窞石溜漱齧敲雷風梓人桃氏不見顧自分委棄蒿
櫟同一朝清廟作雅樂搜索絡繹奔垂工飛廉鼓鑄王
爾斲熾炭利鑿相治礪朱絃橫絙筍簾立鎮圭衮冕齊
雍容世間物理有消息累土自可成穹隆司倉雖微君
莫棄君不見魯叟當年嘗委吏

弋陽方氏壽康堂詩

先生作堂依林阜繞屋杉松浮翠濤烏皮靈壽扶鶴髮
項有千歲雙垂條小孫踉蹌竹馬戲大孫綵衣花底翱
有耳不聆闐闐音有目不識簿領曹鸞啼燕語日高起
羽觴沉沉浮春醪君不見非熊老人釣清渭九十鷹揚
亦勞瘁

徐資深華山圖歌

華嶽插天七千丈丹崖翠壁開仙掌壁間壁出黃河流

大禹以之分九州河流衮衮赴溟漲華岳拔出天河上
雲宮霧窟疑本無石室金臺儼相向玉泉高通玉井津
中有蓮實如車輪世人肉食未羽化可望不得聊相親
高堂晚晴圖畫展眼明一見心目遠世間塵土今紛紛
吾當拂衣卧山雲

題仲山和尚羣魚圖

濠梁之樂誰能寫素蟻死後無畫者上人安知身非魚
援毫貌出態更殊刺藤素拂秋雲冷眼前驚見滄江永

翠尾輕披水上萍，玉鱗倒漾空中影。前行十二相迴環，
吹滂煦沫淵沚間。最後羣趨儼成列，皎若寒霄舞流雪。
却思昨夜風雨來，赤鯉已去隨奔雷。鰕魚不作霄漢夢，
潛心泳暖何悠哉。贈言還畫重太息，芒鞋竹杖今何適。
慎勿作海水洶湧龍，崢嶸空令素壁凝塵生。

永康胡元鼎白雲樓

少年辭家往京國，蓬根一斷無消息。有時長想白雲飛，
江海茫茫淚霑臆。歸來拜母悲且喜，悔作他鄉遠遊子。

却起高樓對白雲
綵服翩翩足甘旨
昔日望雲煎百慮
今日看雲美無度
却憶天涯望雲日
平生心事從此畢

贈醫士黃元之

先生軒轅之子孫
手提萬物生死根
神功微妙不可狀
能使元氣回遊魂
篋中汞芽抽粟粒
丹光照耀三彭泣
銜珠不受修蛇報
永藥常令白猿拾
結廬幾歲吳山阿
赤松玄俗時相過
更向蓬萊下神水
併與人世清煩痼
為本大師題唐臨晉帖

乾符天子萬幾暇宮中扈從多儒冠玉堂開宴出晉帖
翠氣蕩搖山雪寒侍臣模寫各臻妙碧樹瓊柯相照耀
令孜嗟嘆至尊喜內官拜舞宮娥笑日斜宴罷歸內園
外門有事人不言君不見關東夜飛赤白丸昭陵王面
秋風酸

題老翁騎牛圖

白日上悠悠竹梢霧已收晴天不易得及時當放牛鄰
家放牛多兒童我家無兒只老翁寒衣在機織未就原

上烈烈多高風勿言衰老筋力薄有牛可放殊不惡但
願天公不相惱牛背閒眠飢亦好

題額森進德祖母徐氏節義傳後進德之祖以
戰死時其祖母年尚少

凰乃鳳之匹麒麟乃麟之儔錦衾角枕期白髮誰知不得
同山丘丈夫殉節殞烽矢英靈在世何曾死兩龍未合
延平津白日無光天色紫君不見青松與兔絲引蔓相
纏紫松摧絲蔓斷結根猶作千歲苓洞房含風霜露早

孤兒啞啞在懷抱皇天可憐兒長成相見黃泉情亦好
題鍾馗役鬼移家圖

髯夫當前鰲婦後腊鬼作糧驅鬼負虹蜺可駕雷可車
胡為役鬼來肩輿乃知老馗未公正怙威植私干律令
玄雲沈陰鬼怪多馗乎馗乎奈爾何

為杭州鄭善止題蓬萊山圖

君不見大瀛海中有神嶽如崑崙周遭四域五十里石
骨纏繞扶桑根琪華爛日珠炫夜翠樓玉殿虎守闔鍾

山燭龍在其北兩眼煜發如朝暉仙人東王公掌握天
紀弼帝尊長虹為轅龍作馬飄然乘風白日在下弱水
湯湯無力可負芥自從大禹刻石之後來者寡彼秦之
皇其貪如狼而漢之武其欲如虎樓船萬斛空巍巍欲
到不到風掣之徐市蜉蝣身乃欲邀安期文成五利小
豎子羊質彊使蒙翬皮神仙大笑起濤浪射魚海上夫
何為

壽山福海圖歌

吾聞軒轅之國乃在大海之中央其不壽者八百歲壽
者乃與天地同久長樓臺縹緲造雲漢赤日繞戶扶桑
涼玉泉之水清以香瑤草之味如瓊漿洪崖有時來環
佩聲琅琅鳳鳥自歌鸞自語青蜺連蜺白雲舞淋漓豹
髓浮縹觴錯金盤薦麟脯耳聞楚水泣皇英眼見商
郊葬彭祖琪華生樹宵有光東風入律春茫茫春茫茫
樂無極青雛夜夜月中來廣寒姮娥寄消息

為王輔卿郎中題雪灘寒鴈圖

雲茫茫水浪浪林木脫葉無稻梁烏啼鴈叫天蒼涼歲
云莫矣江山長有竹有竹在高岡三株凍折兩復僵小
禽悲飛不能揚蒼梧悠悠隔沅湘欲往從之川無梁願
披寒霄見朝陽勿令嗷嗷傷我腸

題金谷園圖

君不見石家名園擬黃屋蜀錦作圍金作谷暖香烘日
浮紫霄冰紈火布鮫人綃燕釵十二歌白苧珊瑚玲瓏
綠珠舞月榭吹笙引鳳凰霧幄傳觴語鸚鵡爨下蠟光

宵未歇樓上佳人碎瓊雪空將遺恨寄丹青留作千年
後車轍

送人分題得鶴山

丁令威乃在崑崙之墟閭風之巔羽衣誤作塵土夢回
首人世三千年空中落日松栢冷苔霧慘慘含悲泉夢
隨回飈訪瓊田紫雞青鴨還相憐丁令威將奈何野有
雉繳隰有網羅前飛鳥鳶後駕鵝啄腥爭腐聲嘯嘯渺
子懷兮隔烟蘿杳冥冥兮倚長歌丁令威胡不歸槐江

之山連大駟玉樓金嶂中天開玲瓏碧樹鏘瓊瑰鳳凰
有閣鸞有臺君胡為兮獨蒿萊丁令威歸去來

畫竹歌為道士詹明德賦

我所思兮在瀟湘蒼梧九疑渺無際但見綠竹參天長
上有寒烟凝不飛下有流水聲琅琅中有萬古不盡離
別淚化作五色丹霞漿穿崖貫石出厚地風吹露滌霄
有光我欲因之邀鳳凰天路脩阻川無梁孰知畫史解
人意能以造化歸毫芒虛堂無人白日靜使我顧盼增

慨慷玄霜慘烈歲將宴
鼙啼鼙叫天悲涼我所思兮香
茫茫山中紫筍春可茹歸來無使遙相望

題蘭花圖

幽蘭花在空山美人愛之不可見
裂素寫置明窓間幽
蘭花何菲菲世方被佩
蕢蕢施我欲紉之充佩
褱累累
獨立衆所非幽蘭花為誰好
露冷風清香自老

送葛元哲歸江西

我昔筮仕筠陽初官事窘束清事疎
風塵奔走僅五稔

滿懷荆棘無人鋤
明堂大開壯梁棟
散木不遺椽栳用
豫章江上一逢君
矯矯雞羣一孤鳳
城頭月出明星稀
開門望月露沾衣
文章繡衣郎談屑
天葩霏得句即高
歌驚起烏鵲穿林
飛星流雲散隔吳
楚有時夢君詩上
語坐中百谷含清
暉
牕外飄風度踈雨
我住青山耕晚
霞君去蟾宮折桂
華別來八見秋雁
過忽然會合增長
嗟江南二月草未
秀雪陣如濤袞清
晝投壺命觴盡文
友此樂百年何日
又一朝復一朝三
歲如過電四牡彭

彭子獨賢江東山水應看遍看遍人間萬不齊我馬向南君向西海門日照漁浦白驪歌欲斷吳雲低枯蒼山臨川水相思迢迢一千里山高兮水深極望不見愁人心應將魂夢化為鶴永夜月明懷好音

夜聽張道士彈琴歌

道士字君度

白間含光月照席梅花入簷珠的皪
蕊宮道士彈七絃
明星在樹霜滿天鏘如暗泉發幽竇
悄若空山叫哀猿
霧雨寒吹松柏響
波濤怒激蛟龍鬬
神奔鬼怪入杳冥

鷺孤鶴寡風泠泠湘娥宵攀竹枝泣紫鳳曉啄梧桐鳴
悽悽欲斷還復續啼鴛一聲春草綠春然清商行素秋
落葉灑地蟲啾啾擁衾聽之消百慮夢逐行雲自來去
九疑連天洞庭遠海闊烟深不知處藍宮道士聽我語
世無子期誰識女桑間濮上方施行白雪陽春棄如土
辛卯仲冬雨中作二首

江城積陰愁玄冬千家萬家雲水中烏啼黃昏雁叫夜
鼓角慘澹愁悲風青燈無光掩闌坐飢鼠相銜啼過我

讀罷殘書有所思
凍雨霏霏淚交墮

歲云暮矣風蕭蕭
木葉脫落惟空條
雲濃雨細白日短
慘慘不辨昏與朝
雨中行人足斛觥
去與公家製戎服
中原豺虎正橫戈
天寒風急奈爾何

悲杭城

觀音渡頭天狗落
北關門外塵沙惡
健兒被髮走如風
女哭男啼撼城郭
憶昔江南十五州
錢塘富庶稱第一
高門畫戟擁雄藩
豔舞清歌樂終日
割臙進酒皆俊郎

呵叱閒人氣驕逸一朝奔迸各西東玉尊金杯散蓬蓽
清都太微天聽高虎畧龍韜緘石室長夜風吹血腥入
吳山浙河慘蕭瑟城上陣雲凝不飛獨客無聲淚交溢

夏夜台州城中作

江上火雲蒸熱風欲雨不雨天夢夢良田半作龜兆折
秔稻日夕成蒿蓬去年海賊殺元師黎民星散劫火紅
耕牛剥皮作戰具鋤犂化盡刀劍鋒農夫有田不得種
白日慘淡衡茅空將軍虎毛深玉帳野哭不入轅門中

健兒鬪死烏自食何人幕下矜奇功今年大軍蕩淮甸
分命上宰麾元戎舞干再見有苗格山川鬼神當効忠
胡為旱魃還肆虐坐令毒沴傷和冲傳聞逆黨尚攻剽
所過丘壠皆成童聞司恐畏破和議斥堠悉罷雲邊烽
殺降共說有大禁無人更敢彎弧弓山中悲啼海中笑
蜃氣繞日生長虹古時東海辟孝婦草木枯瘁連三冬
六月降霜良有以天公未必長瘖聾只今幅員廣無外
東至日出西太蒙一民一物吾肺腑仁者自是哀鰥悁

養梟殲鳳天所厭誰能抗
䟽回宸衷夜涼木末掛河漢
海嶠月出光玲瓏仰視皇天轉
北斗嗚呼愁歎何時終

寶林同講師渴馬圖歌

天廐馬神龍姿目如明星耳如錐
拳花鬣毛雲陸離揚鬣掉尾頰虹飛
天廐馬閑且驕繫以青絲勒以鑣渴不
得飲瑤池泉飢不得食瓊田苗豆粟不實
中腸朽口不能語足屢蹻天廐馬壯且武
食主之食須報主莖秣失時罪在牧圉
無如宋牼怨不得嚼咀喪厥元戎殄師旅

天廐馬爾不聞趙國廉將軍一飯斗米肉十斤被甲據
鞍走若雲北斬粟腹西拒秦負荆謝蘭不為身至今天
下稱良臣又不聞漢季劉荊州有牛千斤角曲鯨咬食
十倍於常牛負重不若一牝鹿老瞞度江俘楚囚骨肉
解割庖刃游天廐馬飽爾食草間封狼逭誅殛威弧撥
刺矢不直嗟爾神駿須盡力他年定遇田子方櫪上優
游終主德

題釋駢圖

關中小兒勇而競，玉帳貔貅三百乘。焉知道上十二牛，
皇天默佑周同姓。絳宮大厲吼如雷，墨車載甲光照纓。
鷹騰二陵間，劍鋒白皚皚。壯士百戰腦塗地，元帥東來
坐草萊。俘囚有血堪釁鼓，自分殘膏染齊斧。萬死一生
直望外，豈意片言由內主。鴻雁曾傷弓，尚為空眷愁犀。
兕脫匣出，聞呼肯回頭。河邊解驂徒，譙謀舟中稽首空。
悠悠濟河封尸勿云晚，此事終作晉國羞。君不見夫差
違子胥，空灑姑蘇泣。丈夫深戒婦人仁，養虎遺患悔莫

及

中峰永先和尚醉墨圖歌

老先行脚遍天下五湖七澤曾中吞淋漓醉墨落人世
恍惚目擊瀟湘存蒼梧飛龍去不還洞庭赤沙流水渾
九疑竹枝餘淚痕澧蘭沅芷化蕭艾古木雨炫寒烟昏
雲帆縹緲向何處波浪瀕洞驕魚鼈我生胡為羈旅間
感時覩物生愁怨還君此畫歌一曲悲風慘淡來崑崙

題錢舜舉馬圖

吳興公子雅好奇欲把丹青競天巧花蜂柳鶯看已足
貌得驊駟圖更好浪花滿身蹄削礪兩耳抽出春筍尖
風鬣欲拂九霄霧隅目似掛高秋蟾昨者王良失韉鞿
封狼咆哮蛇豕關天閑乘黃越在野出車未見歌南仲
嗚呼安得此馬背負郭令公掃清四海歸奏明光宮

題王元章梅花圖

道人紅顏映髭雪欲與梅花鬪清潔夢魂化作梅花神
貌得梅花最奇絕高軒落筆當晴曦北風吹樹寒雲垂

九霄露洗珠玉蕊野水影動龍蛇枝勞生苦被煩熱惱
見此令人暢懷抱虛堂夜半明月入玄鶴一聲驚絕倒
西湖處士骨已槁湖上淡烟迷蔓草石壇日夜長蒼苔
紫脫瑤英為誰好羅浮山在何處聞道其間無散水只
有梅花三萬樹黃初平在金華山中白羊許借我與爾
並駕凌飛霞

金碧山水圖歌

武陵桃源今有無展畫渾如夢中見青螺作山綃作雲

白日蒼茫暖芳甸雄梁跨壑矯修虹走瀑懸崖激飛電
紫鳳宵鳴梧樹枝青雛曉啄桃花片鳥啼長是豔陽時
草色寧隨霜雪變衣冠尚存周典則租稅不輸秦郡縣
山中肉芝美堪食澗底石泉清可嚙安得此地結茅屋
寄書漫託雙飛燕

題松下道士携琴圖

道士抱琴松下行松風入耳清涼生石梁苔滑不可上
潭水泠泠學琴響琴有意兮水無心水中有龍能聽琴

琴聲淒斷水流咽月滿空山落松雪

題縣崖蘭花圖

洞庭一夜西風起沅湘美人隔秋水翠蕤玉佩冷不收
怨入蒼梧九千里蒼梧之山絕浮烟上與女媧所鍊之
石相牽連瘦根迸雲石為穿紫莖瓊蕊涓飛泉一開一
落三千年歲晏玄霜白日晃南山桂枝化為棘我欲采
之無羽翼月宮青鸞呼不來卧看月明空太息

題雪汀圖

天迷迷地茫茫雲垂日白江水黃
踰烏凍縮龍走藏雪
花如月開扶桑彼何人斯一葉航
手持釣竿詠滄浪詠
滄浪倚逍遙天風吹入瑤池去
素女素娥應見招

為董楚芳題山水圖

金庭接四明會稽藏禹穴半嶺生
白雲如濤湧溟渤我
住城南隔天鏡朝夕看山見山性
是誰模寫作畫圖展
向高堂色相映天上寶書緘石室
翠柏蒼筠曉蕭瑟有
蛟如龍身九屈林深嶂疊不見日
龍氣吐為烟霧出何

處樓臺香靄中蓬萊只在雲門東陽崖不留建木影陰
澗自起樵人風賀知章今已矣湖邊酒船為誰艤赤城
霞標通宛委陟茗花開落松子蕙帶荷衣歸去來清泉
素石無泥滓

寄陶中立郭秉心叙舊言懷

為別未五載恍如生死隔有時長想愁欲狂中夜感歎
無羽翼憶昔相逢俱壯年錢唐柳綠花含烟粉牆繚繞
子雲宅華燈照幙自草玄春城飛雪滿一月立馬敲門

馬蹄沒銅壺驍箭三十六易坐更投鏃相抔仰天大笑
催命觴酒多雪急天茫茫論文握手到爾汝知有膠漆
無參商君行却向江東去我亦棲遲廣文署震澤風驚
白鴈秋玉山露落青楓暮井邑蕭條却火餘行人何處
問緘書傳聞那得辨真假引領遙望空嗟吁今年飄泊
越城裏重見手書悲且喜舊游雖在舊人非獨立看雲
淚如水羨君絳帳開海濱綵衣堂上生陽春艱危大幸
適樂土況有主翁賢且仁嗟余數與時不偶畫虎不成

祇類狗家鄉蕩析身轉蓬棄置田園事奔走豺狼在郊
蛇在藪府縣官曹但餬口藩垣久厭邊鄙報旄丘載馳
徒疾首郭公子今何如璞中之玉可照車委棄土壤慚
砮砮往事轉頭同過翼猿鶴蟲沙豈終極南山直幹劈
雷電般匠束手無顏色殷勤寄情素會面未有期願言
努力各自慰莫遣青鬢先成絲

和吳以時秋夜長篇

秋夜長今日何日此何鄉流螢在砌苔在墻明星滿天

月照牀東西南北路渺茫車何為乎水中央秋夜長今
日何日此何鄉

雪晴偶興因以成篇

玄雲四垂天黯黯大野蒼茫飛雪糝北風刮面利如刀
海氣昏昏迷遠覽若華東光封密霧比屋無烟色悽慘
天姥沈陰禹穴閉扶胥海濤渾不撼愁埋朱鳳入杳冥
局縮赤蛟深坎窞猿狖哀號咽巘谷鴻鴈驚啼亂葭茨
壯士金戈鉞鏑凌將軍玉帳旌旗驟師徒百萬盡熊羆

幕下從官皆燕頤馬蹄蹴蹋坤軸震夜半入蔡何人敢
空山野客拙且懶旅舍蕭條坐無毯頑童汲井十指直
稚子敲冰兩髻髧今朝出日照梁棟樓外遠山皆齒齒
初驚急溜瀉源泉漸看縣漸掛旒紱那無美酒洗胃臆
空有新詩吐肝膽先人敝廬松柏在墻角早梅應可擘
蝮蛇張鱗虎掉尾平地倏忽成窟掩藩閭官曹厚祿食
忍以黔黎為醢臚天民日望天愛憐破瓦頽垣最悲惜
農家齊仰二麥成且喜土膏滋九坎清晨樹上啼布穀

柳下碧波漪澹澹安見扁舟泛五湖莫使中心攢百感
題陸放翁賣花叟詩後

君不見會稽山陰賣花叟賣花得錢即賣酒東方日出
照紫陌此叟已作醉鄉客破屋含星席作門溫螢生竈
花滿園五更風顛雨聲惡不憂屋倒憂花落賣花叟但
願四海無塵沙有人賣酒仍賣花

題柯敬仲墨竹花石

紅桃花天天綠竹葉薺薺水邊石上相依倚恰似佳人

配君子奎章博士丹丘生寶書鑑盡芸閣清染朱涅翠
歸墨筆收入造化無逃形烟濃風暖春如醉竹有哀音
花有淚花枯竹死今幾年空留手跡令人憐

包與直題太一真人圖

太一真人厖眉鬚不知所持何代書既不學昴星降精
下輔隆準公又不學傳說請帝通夢寐左右商王陳範
謨眇然一葉蓮花萼清秋風吹落泥塗紅凋粉瘵不可
扶君何為乎以為桴蕩漾九河凌五湖夸耀水伯驚天

吳坐令文成五利之輩假借神聖欺庸愚靈旗風翻壯
荆符麀鹿無鬼夫何辜漢官天祿連石渠金釭銜壁麗
綺疏青藜有燄如芙蕖何不分餉依光夜績之徐吾高
堂眈眈縣畫圖作歌一笑駭里閭

為戴起之題猿鳥圖

牧谿畫

巴東之山巫山高連峰插天關健牢中有懷陵巖谷之
波濤藤蘿杳冥風怒號人跡不到神鬼逃但見野猿沙
鳥羣相嘈聲取百竅搖巖壑此景可聞不可遭爾何為

乎貌以毫毛嗟哉用心無乃勞江盤峽束雷雨昏崩崖
死樹纏古根玄猿抱兒隨白猿長臂嫵媚相攀援舐
譎詭趨騰縣柯攫石墜且掀上有滿月如賴盆簣簞桃
枝寒自蕃嘉實不食鳳高翻但見娥皇女英之淚痕勢
窮險盡原野闢落日烏鴉繞雲黑荻花茫茫蘆葉赤前
飛鵠鵠後鳬鷖瀟湘洞庭烟水碧騶虞鸞鷺無顏色還
君此畫長太息獨立看天淚沾臆

題界畫金山圖

岷山導江入海長金山却在江中央下有地軸連扶桑
上有鳥道通九陽白波繞之如雪霜杳然浮空或低昂
但見危樓峻閣造牛斗似蓬萊之鏘鏘撞金伐革殷朝
廊歲甃翠葩相焜煌巖崖洞谷蛟龍堂斑鱗錦紋顏頤
張隱嶙竊窕變暄涼虎蹄豹跡萬古不可到海若夜出
雲霞香摩尼之珠明月光目連持來自西方謂能驅遣
毒沴消災殃轉惡為善回妖祥嗟我欲往不能翔畫中
忽見心飛揚涉水有罌野有狼武陵桃花今渺茫浩歌

一曲增慨慷

題界畫卧龍山樓閣圖

巍巍乎大海之西浙河之東是曰會稽夏后所封吞雲
吐雨隔躔次闔闢光景調春冬地平天成五千載職貢
長與中華通洞天石室神仙宮香爐紫氣騰芙蓉禹穴
窈窕潛蛟龍玉書金簡今無踪但見蒼松翠柏晻曖開
白日猿猱叫嘯生悲風卧龍何蜿蜒向之離立如孩童
上有朱甍碧瓦縹緲浮玄穹流星穿牕月掛戶下視水

水光玲瓏多年不見嘗瞻處
野花自落莓苔中綠蘋香
飄楊柳濃漁舟一葉波溶溶
黃冠賀老已寂寞澹烟細
雨空青楓雁山狂客意匠工
能以翰墨偷天功對此使我
心神融便欲築室依龍從短
衣瘦策尋葛洪嚙服石髓餐
晴虹翩然遠逐浮丘公不須
懷古意慘戚伯夷綺季俱蒿蓬

題羣龍圖

世間萬類皆可觀茫昧獨有鬼與龍
此圖畫龍二十四

狀貌詭譎各不同得非物產有異種或曰神變無常蹤
一龍捷尾欲上水足爪猶在龕沚中一龍出穴飲澗底
頭上飛瀑瀉白虹前有一龍已在雲顧視厥子揚雙瞳
浪波魚鱗香磴礧日車塊圯天無風中庭兩龍忽相逢
鬚眉葩髣如老翁便欲角觝爭雌雄西望積石接崕峒
白龍擘石窺流淥河伯遠遁虛其宮屈蟠睡者何龍鍾
老物用亢時當終峽外六龍寧以克矜牙舞爪起戰攻
齧鱗嚼甲含劒鋒陷胸折尾波血紅之死弗悟人誰恫

一龍引吭將欲從迴環睚眦未敢通最後一龍藏于壟
睥睨勝敗非愚冲無乃有意收全功雲中弄珠勞爾躬
不如卧沙之從容龍子學飛力未充母在下視心憧憧
何物一角額準隆鯨然出洞若蛇蟲有龍接之自龍從
恐是輦穴王鮪公皮骨始蛻形猶蒙兩龍歸來倦不翀
癡龍攀石身已癢蚰蚪偃蹇歛騰衝蛻螭攫躍鬚髮茸
呿呀奔拏曲如弓百態並作何紛厖是耶非耶孰能窮
畫師昔有僧繇工能令真龍下虛空安得伶倫截竹筒

吹之呼龍出石罅使我一見開昏瞢

為丘彥良題牧谿和尚千鴈圖

往時惠崇畫蘆鴈對之如在江湖游只今此圖又精妙
中有千里瀟湘秋乃知浮屠性多巧意匠不與凡夫儔
吳松江長具區闊天目虎丘青一髮西風九月杭稻黃
朔鴈飛來翼相戛農夫苦飢鴈獨飽此意畫師應識察
近者分明辨羽毛遠者縹緲瞻秋毫或乘飄風入烟霄
或翳落日沉隍濠起如武侯布八陣集如萬舞回旌旄

眠沙卧草鳴且翔
喋呷藻荇亂蓬蒿
未空穗盡却歸去
風寒漠漠春雲高
我家南山限蒼嶺
鴈飛不到川路永
深林大谷蛇豕盛
愁向他鄉撫虛景
人言鴻鴈比弟兄
我有兄弟隔兩城
題詩卷畫謝客去
無使感愴傷中情

雨中寄用章上人

月盈復魄已過五
不見白日長見雨
美人娟娟隔巷陌
會面不得徒延佇
昔邪當門泉湧礎
仲蔚蓬蒿塞環堵
陰風見人作秋氣
芳草日夕成宿莽
玄圭上天禹穴閉

倉水使者今何許玉京羣仙翳煙霧弱水西流隔玄圃
女夷鼓歌不自覺朱鳳翅濕那能舉自從干戈起淮甸
天下無處無豺虎徵斂頻煩轉輸急更有何鄉為樂土
翳桑餓人誰復數思家遠客空悽楚半生身世付浮雲
獨立看雲百憂聚晚來天南橫絳虹雨勢未已愁雷公
井蛙谷鮒俱得意汜濫潢潦登穹隆方外文章誰最好
後有嬾公前笑老裁詩忽漫寄中情萬事茫茫聽蒼昊

玉澗和尚西湖圖歌

大江之南風景殊杭州西湖天下無浮光吐景十里外
疊嶂湧出青芙蓉百年王氣散荆棘惟有歌舞留歡娛
重樓峻閣姑鉛黛媚柳嬌花使人愛老僧不善兒女情
故作狎豪見真態想其泚筆欲畫時高視化工如小兒
千巖萬壑吾意匠夸娥巨靈吾指麾却憶往年秋雨夕
畫舫衝烟度空碧蒼茫不辨雲與山但覺微風響蘆荻
須臾冷月迸深霧時見松杉半昏黑開尊命客彈焦桐
扣舷大笑驚海童鮫人唱歌魚鼈應水底影動雙高峰

只今倏忽成老翁可憐此樂難再逢
愁來看畫欲自適誰知感生愁轉劇

顧周道山水圖歌

憶昔晉時顧虎頭能畫聲名塞穹昊
千載而下繼者誰君之耳孫字周道
江南山連滄海島水遠山長愁絕倒
興來走筆如有神濃抹淡妝無不好
前峰倚天自太古知是天台是天姥
烟開浪波搖浦溆草滿汀洲樹如羽
山迴兩崖夾幽谷小橋俯映菰蒲綠
扁舟何處覓鱸魚

滄浪水寒空濯足柳邊碧石明素沙茅廬似是陶公家
衡門晝掩雞犬寂誰人共采黃金花我屋雙溪松柏裏
清泉皎潔無泥滓鳳皇不來鷹隼逝白日鷗鴉嘯桑梓
華表柱頭丁令威風塵瀕洞何當歸感時對景重回首
不知人民今是非

題米元暉瀟湘圖

米家父子皆好奇戲弄筆墨如小兒三百年来傳幾手
坐見銷鑠同春澌丹青馳譽士所恥勉強徇物寧非癡

蒼梧之山鬱敬嶷重華往矣空寒颶猿啼鳳去竹迸淚白
日慘淡令人悲瀟湘洞庭連鄂渚江漢波濤動荆楚不見
軒轅張樂時水妃怨泣鮫人語問君此圖何處得中有遠
意衆莫識君不見岐陽石鼓字泯滅千載猶為人愛惜

題趙學士色竹圖

竹性本孤直磬折良可憐由來剛介有摧挫歲寒然後
知真堅虛堂無人清氣會日滿高林風影碎漆園胡蝶
去茫茫冷落瀟湘蒼玉佩我思美人淇水隈路永莫致

增悲懷雪霜紛糝嘉實晚不知鳳皇來不來

題富好禮所畜村樂圖

我昔住在南山頭連山下帶清溪幽山巔出泉宜種稻繞
屋盡是良田疇家家種田恥商販有足懶踏縣與州西風
八月淋潦盡稻穗櫛比無蝗蝻黃雞長大白鴨重瓦甕琥
珀香新筍芋魁如拳栗殼赤獻罷地主還相酬東鄰西舍
迭賓主老幼合坐意綢繆山花野葉挿巾帽竹筍漆碗兼
甕甌酒酣大笑雜語話跪拜交錯禮數稠或起頓足舞侏

儒或坐柏手歌甌簞傾盆倒榼混醯醬爛漫沾漬方未休
兒童跳躍助誼譟執遁逐走同俘囚出門不記舍前路顛
倒扶掖迷去留朝陽照屋且熟睡官府亦簡少所求寧知
宴安含飮毒耒耜一變成戈矛高門大宅化灰燼蓬蒿瓦
礫塞道周春燕營巢在林水深山露宿隨猿猴三年避亂
客異縣側身天地如浮漚親朋阻隔童僕散疏食水飲不
自謀有時恹恍夢閭里驚覺五內攢百憂君家畫圖稱絕
妙鑒別曾遇柯丹丘想應臨榻出秘府筆意精到世罕儔

村歌社舞自真率何用廣樂張公侯太平氣象忽在眼令
我感愴涕淚流近者鄉人來報喜今歲高下俱有秋豺狼
食飽卧窟穴軍師已運招安籌人情自古共懷土况乃霜
雨淒松楸神龜且被預且困予所弗念天我尤積薪厝火
非遠計誰能獻納陳嘉猷長江波浪接淮泗白日慘澹騰
蛟虬天下農夫總供給隴畝不得安耒耨市中食物貴百
倍一畝之價過於牛魚鹽菜菓悉賣米官幣東閣若贅瘤
朝餐僅了愁夕膳誰復有酒澆其喉循環天運往必復

邪氣暫至不遠瘳此生此景須再覩引領悵望心悠悠

題湘湖圖

君山洞庭隔江水彭蠡無風波浪起明牕曉晴圖畫開興入
湘湖三百里浙江兩岸山從橫湘湖碧繞越王城越王城荒
陵谷在古樹落日長烟平游子天寒孤棹遠七十二谿飛
雪滿浩歌不見濯纓人沙鶴野猿相對晚湖東雲氣通蓬
萊我欲從之歸去來蛟鼉塞川陸有虎兩臂無翼令心哀

為啟初門和尚題山水圖

天下名山隨處有畫圖流傳亦良久祇園道人展橫幅
觀者稱誇同一口蒼梧九疑高插天卷而懷之不盈手巨
靈驚呼盤古怒地軸塊圯昆侖剖太陽出海開杳冥嵒
冢岷峨大如斗華軒無人清晝閒恍然置我匡廬間金輪
迥出牛女上遠近羅列千雲鬢江花野竹青錦斑嵌巖斷
石蛟鼉顏岡盤谷轉絕徑路但見湖水迴瓊環白沙洲暖
春風起南船掛帆北船艤吳波不盡芳草外楚岫半入長
烟裏夜深小龍行雨歸宮亭月落彭郎磯旌陽步虛盧老

和雜佩散作虹蜺飛百年塵世真夢寐回首旌旗塞天
地舊游何處成渺茫一曲狂歌數行淚青丘弱水迷方
壺武陵桃源今有無瑤臺三島消息斷安得羽翼歸清都

題趙學士松圖

塔白

趙公拈筆作古松平地躍出三青龍蜿蜒不上霄漢去
爽颯長留烟雨濃前朝美人鬪草處猶有當時數株樹
江亭六月涼如秋應與此圖相對愁

題李陵見蘇武圖

中原無書牋不乳狐裘蒙茸奈何許老身漢節死生俱
地角天涯見明主金鞍駿馬空故人相看一笑增悲辛
悲來風沙吹上馬河水東流日西下

空一作吾

陳彥德以畫見贈詩以酬之

君不見昔者來南宮又不見今時趙學士能將翰墨爭
鬼工天下流傳名父子枯蒼處士身姓陳小郎英俊尤
可人欲收大地入掌握筆意所到如有神曉攜小幅來
贈我紅日滿牕花婀娜開軒展視心眼寬如在岳陽樓

上坐湖波吹烟入遠山君山乃在湖中間蒼梧九疑隔湘
浦孤雲日斷幽篁斑漁舟一葉來何處巫峽雨昏啼鵑
暮澤畔行人久不歸沙上輕鷗自飛去陳公子聽我歌
深林大谷龍蛇多蓬萊三島可避世欲往其奈風濤何

長平戈頭歌

長平戰骨烟塵飄歲久遺戈金不銷野人耕地初拾得
土花漬出珊瑚色邯鄲小兒強解事枉使泥沙埋利器
四十萬人非少弱勇怯賢愚一朝棄陰坑血令秋復春

朽壤食盡蒼蛇鱗湮淪長愧杜郵劍廢墜空憶椿喉人
故壘中宵鬼神入雲愁月暗戈應泣嗚呼當時豈無牧
與頗戈乎不遇可奈何

錢王箭頭篇

鴟夷遺魂拗餘怒欲取吳山入江去雷霆劈地水羣飛海門
扶胥沒氛霧英雄一怒天可回肯使赤子隨鯨鮪指揮五
丁發神弩鬼物辟易腥風開三百年来人事改濤落沙平箭
空在石梁飲羽未足誇蜀國三犀漫欺紿近聞黃河水亂流

青徐一半悲魚頭安得壯士幹地軸為拯斯民塗炭憂
次韻和石末公七月十五夜月蝕詩

招搖指坤月望日大月如盤海中出不知妖怪從何來
惆恍初驚天眼睽兒童走報開戶看城角呻吟聲未卒
蟾逃兔遁漠無踪壁隕珠沉一何疾丈夫愕視隘街巷
婦女喧呼動圭華輝輝稍辨河漢沫耿耿漸明荒冢漆
百官袍笏羣吏趨伐鼓撞鉦仍設鞀赤水難令罔象求
澗池莫效相如叱升簷變閣到空曠塹掩氛侵殊靡畢

廣寒桂樹却火燼借問嫦娥有何術今年下土因炎沴
草木焦枯野蕭瑟萍號喝死龍甲炆赤燂當衢掛萍實
光芒照灼玄武爛誰復瑣瑣憐蚌鷸今夜慝作最差異
天道幽微孰能詰太陰配日宰臣象無乃常形多縱軼
近來營壘徧宇內羽林慘澹空鐵鎖荒郊廢市何所見
夔罔蛟蛇兼蚤蝨此皆在地不在天未若蝦蟇狡而獮
黃文結鄰上訴帝賜以小戎驂牡騰剖墓洗魄還月光
再起咎繇明典秩返蟾歸兔復織阿萬古游塵避清蹕

再用前韻

虞淵浴餞納歸日金樞吐月相承出初離積水看若飛
稍映微雲盼猶眊是時蓐收肇視政莎雞振羽鳴蜩卒
姁娥靚妝覲王帝坎軻中途嬰禍疾旅人苦熱愛清涼
快覩光輝滿蓬華願開寶鑑照覆盆豈擬瘴塵昏點漆
隋珠斲固重革櫃和璧嗟蒙韎韞韞吳置樹折不自謀
纖阿馬弱無人叱三足蟾驚入坎窪八竅兔走懼且畢
圓灰破暈漫傳方盾王補凹空著術雷公駭懼罷靈鼓

湘女幽憂含鳴瑟故老謂是蝦蟇精潛伏姦妖營口實
義和尸位罔聞知可以人而不如鵠往歲威弧弛其設
蛇豕陸梁誰復詰高牙大纛擁藩垣腸斷吞聲受陵軼
江淮洶湧湖浙沸骸骨成山連鬼鎖萬姓喁喁釜裏魚
百官蠢蠢禪中蟲黃牙白茸棄賢良赤紱玄裳寵獐獍
吳穹示變盍警畏惟德動天天自隲況今旱魃又為厲
東作西成不平秩安得緘辭伏閭闔聖主如聞應駐蹕
涇縣東宋二編修長歌

浙東行人過江左正值蕤賓之管吹輕葭陰氣黯黹天
地閉仰面不見扶桑鴉谷風哀鳴灌木應雨脚四垂如
亂麻崩湍湧溜汨奔會平地碾齧作白窪使疑桑田變
滄海流承熒眼無津涯管茅披猖黃竹拜蛙黽狼籍助
喧譁滿路青泥雜隕籜局縮畏觸蛭與蛇破瓦荒畦舊
市井荆榛穢與巢麕麕翠眉蟬鬢轉蓬去頽墻缺甃劫
火燬善淫禍福不可料韶艷夭閼令人嗟叢祠佛殿總
銷歇但見木偶眠泥苴前度長洲絕短澗輿從沾濕水

沒勝寒颼瘁瑟透衣袖雖有氈蓋那能遮水邊老鸛學
人立鷺鷥侍傍如小嫖廢田蔓草結旌旆農夫盡化為
蟲沙布穀不知時事異勸耕終日聲查查晚來雨歇到
涇縣只有蒿荻無人家縣官趨迎入公解筋攣骨解肉
半麻蕭條破竈冷灰地飢童凍口張哈呀溲沱麥飯那
能致新豐酒醪何處賒古稱悲歌可當哭莫怪笑謔同
兒哇夜深月出照庭樹鬼燐一似青蓮華驚魂遁魄稍
歸舍收入志慮無令那愁愁曉霧子規叫起坐更盼義

和車

聽蛙

繞舍荒池底，且魴蟄蛙齊。候鳴雷社已，知地氣上如炊。
更覺石泉流，若瀉舉頭玉。燭煥陽明跼足，汙泥悲土苴。
半夜條風入，綺牕清晨細。雨霏簷瓦梁間，紫燕舞參差。
枝上黃鸝語，悲咤播形肖。貌均有生，感氣傷情，孰瘖瘂。
初聆衙衙雜更鼓，漸聽嘈嘈成侈哆。猶持堅白較同異，
似坐狙丘談稷下。村童叫噪聾學究，悍婦勃磈喧娣姐。

西域胡僧彈般若齊東老生矜炙輶逸帆觸岸靡蒹葭
醉客罵筵投盞竿咬誰辨驃兒哇號耆乍開賓叟囁
怒牙嚼齧悸羅吞寤言詰屈驚宜楸徒夸楚使能詈齊
未讓秦巫工詛芋兜離傑侏紛覲縷帝樂虛張洞庭野
虞夔奚暇調笙磬周輶曷由分鄭雅旅人懷憂實無寐
遭此彊聒胡為者得非作姦謀蝕月無奈聚訟騰謔
昔聞周公立典教蠲氏專司鞠灰灑常疑聖人茂育物
獨向微蟲少寬假乃今知其非瑣屑欲問官司之餘地

鳳皇鸞聲苦希白雪陽春和偏寡蚊蠅蚤蟲多於沙
鑽啞啞鳴紛醜覩蝦蟇幸不含毒螫何苦吮號爭跢跢
烏鳶逐響蛇聽音寧顧入腹生癰疽賦詩却笑柳州
忍使腥臊辱鮪鮓

贈道士蔣玉壺長歌

先生清如玉壺冰神閒志一精粹凝玄黃健順六子承
和氣坤北麓穢澄冲虛澹澹廓以弘冥茫沕穆恬無能
火鳥入海陰液升鶡蛇受約不敢騰束縛龍虎如寒蠅

虛無黃堂帝所憑四方上下齊鈎繩北幽羅酆對朱陵
女夷鼓歌王母應瓊宮夜半張華燈金葩碧葉紅氍毹
素霞鬱滃玄雲烝沆瀣厭浥淪泉興牽牛織女來相仍
用之不減亦不增地官錫福天官徵老蚌迸殼驪珠升
太一象輿驂八鵬翼以六蜺前五騰風輪蕭蕭生夏凌
參旗九斿棧緄縢二八青蛾美目矚翠黠交翟翺腰贈
屬車九九如連繩最後雷輶子所乘流蘇勃窣垂鏤膺
編欄駁馬駟駘躑躅霞踏霧碎綺綾天津閣道輔輶輶

歸來瑤臺十二層月光照耀玻璃棚下視瀛海波濤砮
龍宮蜃窟寒兢兢歸塘暘谷清可憑鱗甲鏡瑩鰐與鯨
湘妃鼓瑟冰絲絙撻金夏王萬穴澆琅玕風吹殷峻嶒
琉璃雲母龜貝朋琳房壁甃瑤階陞素鸞振迅霜女扔
璇題瑣牕肅藹藹洞晃矐朗眩遙瞪瘁肌砭髓魂欲殤
忽然浮空墮杳曹颺颺電燿羽脫肱天衢阻遐世網罟
昏昏日月敲炎蒸句曲之山岑硃礪楓杉檜栢櫛桂杪
衡蘭杜若蕙蔭萋綠岡被嶺幕礪塍大地浪井瀑練滿

萍瀕繡繪芙蓉凌鼉虬蚪千年藤纏絡薜荔縣翦鬚
敷芳發馥菲菲芳獬狔獬狔蒼鷹攀援歛耆巖粵明
寒蜚蟪蛄蟬犯蟪嵐餐靄飲喧岌岌先生皮冠衣絳繒
桃枝七尺穿虺螭三茅真君共嗟稱星根絕頂時同登
黃斑黑虎陟降凭石罅甘漿溢若澗神芝吐燄如簣簠
食時動機保不薨驅斥琚瓊除癥癥眸光照座生紫稜
舉觴引滿鯨喉渠解后見之喜莫勝揚眉抵掌開蒙顙
人生嘉會安得恒靖恭正直天所興作詩持贈匪妄譏

初夏即景

前日大熱釋我裘昨日一雨涼如秋寒暄倏忽反覆手
冰炭著體何由瘳今朝初晴又欲暖園中草芽輒復抽
嗚呼安得伶倫吹嶰竹四氣不愆同玉燭

近體詩

丙戌歲將赴京師途中送徐明德歸鎮江

疲馬懷空櫪征衣怯路塵那堪遠遊子復送欲歸人月
滿西津夜花明北固春論文應有日話別莫悲辛

過南望時守閘不得行

客路三千里舟行二月餘壯顏隨日減衰鬢受風踈蔓
草須句國浮雲少吳墟愁心如汶水蕩漾遶青徐

發景州

澹澹夕風作蕭蕭蘆葉鳴林間衆鳥息河上一舟行海
近雲常濕天虛月更清神京看漸近且緩望鄉情

泛海詠霧

海上苦多霧北風吹更長纔交積水氣已翳太陽光淺

亂洲渚色深迷鴻雁行神姦馮出入君子慎周防

黃州團湖董氏鏡心樓

團湖四面開明鏡中有高樓接太清絳氣往來蟾影入
碧光浮動日華生雲間威鳳孤飛下空裏遊魚作隊行
安得翠輶呼弄玉金銀臺上卧吹笙

無題三首

一片浮雲萬里心海波無底未為深虞淵險迫羲和疾
空使傍人詫鄧林

玉樹沉沉結夜愁
金陵蔓草沒荒丘
誰言錦纜江都去
不見金陵蔓草秋

黃鵠高飛雲路遐
野鳥謀食但泥沙
山中檣櫓年年在
看盡西風木槿花

題墨菊

粲粲金英美可餐
九秋風露與清寒
墨君莫妬天然色
終遣靈均怨子蘭

題涉溪驛

澗水彎彎繞郡城老蟬鳴作車輪聲西風吹客上馬去
夕陽滿川紅葉明

過閩關九首

關頭霧露白濛濛關下斜陽照樹紅過了秋風渾未覺
滿山秔稻入閩中

峻嶺如弓驛路賒清溪一帶抱山斜高秋八月崇安道
時見棠梨三兩花

建溪激箭向南流石齒如鋒鬪客舟篙子踏歌渾不畏

行人遙望替生愁

驛路高低度嶺關
兜離人語雜夷蠻
江花巧似駝茸白
山果渾如瑪瑙殷

飯淅香瓊酒潑霞
驛亭到處只如家
征夫但恐咨詢闕
莫向天涯怨路賒

漠漠輕雲結晚陰
依依斜日掛遙岑
炊烟忽起桑榆上
散作鮫綃抹半林

道上黃埃撲馬鞍
汗流如水透中單
忽驚踈雨林梢過

急換羅衣更怯寒

劍水悠悠南去深黃茅苦竹自成林日烘溪霧生秋瘴
風攪山霏作晝陰

嶺上高秋生火雲狂雷送雨忽紛紛鷓鴣更叫空山裏
縱是無愁亦厭聞

錢塘懷古得吳字

澤國繁華地前朝舊此都青山彌百粵白水入三吳艮
嶽銷王氣坤靈肇帝圖兩宮千里恨九子一身孤設險

馮天塹偷安負海隅雲霞行殿起荆棘寢園蕪幣帛敦
和議弓刀抑武夫但聞當宁奏不見立庭呼鬼蜮昭華
袞忠良賜屬鏤何勞問社稷且自作歡娛秔稻來吳會
魚鼈出具區至尊魏北闕多士樂西湖鷁首馳文舫龍
鱗舞繡襦暖波搖襞積涼月浸甍甍紫桂秋風老紅蓮
曉露濡巨螯擎擁劍香飯漉雕胡蝸角乾坤大鰲頭氣
勢殊秦庭迷指鹿周室嘆瞻烏玉馬違京輦銅駝擲路
衢含容天地廣養育羽毛俱橘柚馳包貢塗泥賦土腴

斷犀埋越棘，照乘走隋珠。
弔古江山在，懷今歲月逾。
鯨鯢空渤海，歌詠已唐虞。
鴟革愁何極，羊裘釣不迂。
征鴻暮南去，回首憶尊鱸。

題畫梅

夭桃能紫杏能紅，滿面塵埃怯晚風。
爭似羅浮山礪底，一枝清冷月明中。

讀史有感

千古懷沙恨，逐臣章臺遺事最酸辛。
可憐日暮高唐夢，

繞盡行雲不到秦

分臧臺

突兀高臺累土成人言暴客此分羸
飲泉清節今寥落
可但梁山獨擅名

漫成

階下青苔砌上莎
春深烟雨自相和
幽蘭生在空山裏
縱有清香奈爾何

至婺州聞官軍自溫處之江東所過皆空遂從

間道還鄉

聞道人家總避軍，我亦獨穿豺虎羣。
莫思身外路多棘，且喜雨晴山出雲。
林端石磴鶻自占，澗底風松猿共聞。
他年想象或夢到，兩鬢白雪應紛紛。

稽句嶺

白日隱巖壑，千崖氣勢豪。
溪流婺女關，山入少微高。
危石天歌側，長風谷怒號。
干戈方自此，行役敢辭勞。

感興七首

昭代仁聲浹九夷野無矛戟有鉉基誰言潢海操兵覺
却產宮庭制禮時廣路駢駢周四牡陰風肅肅漢靈旗
弔民伐罪元戎事旰食宵衣上聖思

清時不樂道干戈鼯鼠其如虎豹何淮海風雲連鼓角
湖山花木怨笙歌紫微畫省青烟入細柳空營白骨多
惆悵無人奏丹宸側身長望涕滂沱

衣冠共喜際雍熙豈意豺狼負盛時禮樂百年忘戰久
風雲八陣得才遲神謀不是閭閻識廟筭誰聞黼黻思

慚愧鰕生懶無用江湖愁望鬢成絲

將軍意氣薄丹霄欲把孤航截海潮
蘓武節來無忌死岑彭營惡子陽驕
鴟鴞詩奏忠誰白松柏歌成恨豈銷
悵望天涯一灑淚鯨鯢罔象雜三苗

落日悲風雲滿川家家閉戶少炊烟
也知渤海無龔遂漫憶邯鄲有魯連
三尺青萍思出匣數莖白髮望歸田
請看如鏡南樓月此夜清光最可憐

天弧不解射封狼戰骨縱橫滿路傍
古戍有孤鳴夜月

高岡無鳳集朝陽
瑀戈畫戟空文物
廢井頽垣自雪霜
漫說漢庭思李牧
未聞郎署遣馮唐

天上九關森虎豹
人間七澤起龍蛇
塵埃不辨風雲色
雨露全歸枳棘花
秦國有人迷鹿馬
周郊無土載蟲沙
淮濱何日歌常武
腸斷嚴城戍鼓撾

越山亭晚望

越絕孤城枕海湄
越王亭下景遲遲
雲埋夏后藏書穴
草沒秦皇頌德碑
鑿齒未馴虞禮樂
戈船猶駐漢旌旗

春風淡蕩吹楊柳
笑看吳鉤有所思

謁夏王廟有感

一片宮垣粉
艘新前王陵廟在松筠
玉書金簡歸天地
貝葉曇花詫鬼神
滄海波濤紆職貢
山川草木望時巡
苗頑未狎虞階舞
空使忠良淚滿巾

寒夜忽然有懷周紫巖先生
遂成口號奉寄且
以酬黃柑之惠

柱下先生住紫巖
倚天愁嶺氣巉巖
巉巖客來每託青猿報

書寄還憑白鳳銜日上寒光生水石月明晴翠落松杉
旅人珍重黃柑贈愧乏瓊瑤荅素緘

冬暖

今年南國天氣暖十月赤城桃有花江楓未肯換故色
汀草強欲抽新芽野畦落日舞殘蝶小池過雨喧鳴蛙
城上幾時罷擊柝愁見海雲蒸晚霞

不寐

不寐月當戶起行風滿天山河青靄裏刁斗白雲邊避

世慙商綺匡時愧魯連徘徊懷往事惻愴感哀年

題梧桐折枝翎毛圖

瓊柯碧葉兩參差又是西風白露時鳳鳥不來嘉實晚
小禽銜上最高枝

題竹根小禽圖

竹露無聲墜碧柯小禽相對啄秋莎江湖雁鷺肥梁稻
繒繳連天霧雨多

題畫猫

碧眼烏圓食有魚
仰看胡蝶坐階除
春風漾漾吹花影
一任東郊鼠化鴛

漫成

春雨日日送愁來
雨中百花渾未開
青山不見神禹穴
碧草已滿越王臺
魚兒弄水浮還沒
燕子尋巢去却回
頭白揚雄嬾獻賦
衡門從此掩蒿萊

夏日雜興七首

眼見青苔上短垣
忽看碧草翳衡門
西來急雨寒聲壯

東望扶桑曉氣昏，征戍誅求三載外。
詩書禮樂幾家存，天涯地角風塵滿。
極目雲霄漫斷魂。

愛此南園僻，有餘依稀景物似郊居。
風軒自舞蒼筤竹，蓮沼雙遊赤鯉魚。
釀酒剩收元亮秫，換鵝時寫右軍書。
人生縱意惟踈嬾，莫遣門多長者車。

聞道中原沸似糜，倚楹長嘯不勝悲。
百年城郭連烽火，千里桑麻委蕨藜。
南國久紆方叔旆，東郊未返魯侯旗。
五湖何處堪垂釣，腸斷松楸入夢思。

故里無書問遠遊他鄉萍梗漫淹留
盲風怪雨蛟龍喜
荒楚寒蕪燕雀愁
天上古今星北拱
人間日夜水東流
誰能走報西王母
乞與還丹駐黑頭

魯樓迢遞俯清郊
天際羣山檻外交
日暖水禽鳴哺子
風輕沙燕語尋巢
綠荷雨洗藏龜葉
翠竹烟寒集鳳梢
可歎仲宣歸未得
苦吟終日倚衡茅

夏至陰生景漸催
百年已半亦堪哀
葺鱗不入龍鰲夢
鍛羽何勞燕雀猜
雨砌蟬花黏碧草
風簷螢火出蒼苔

細觀景物宜消遣
寥落兼無濁酒杯

菱葉荷花漸滿池
紅榴綠篠正相宜
天邊日出園葵覺
地底雲生柱礎知
長夏未應炎暑過
薄寒恰似晚秋時
朝來苦怪雙青鬢
輒向風前學素絲

夏日訪王友文留飲贈詩

長夏園林白晝閒
高軒留客雨漫山
傾壺竹葉沉沉綠
落樹楊梅顆顆殷
檻外新荷搖水佩
簷前弱柳舞風鬟
醉來帶月浮舟去
忘却塵埃世路艱

題江村風雨圖

日落千山風雨來，野昏林黑鳥飛迴。
風吹烟霧連天起，雨送雷霆入地回。
龍母鮫綃雲半濕，巫娥貝闕夜深開。
暮寒燕子歸華屋，愁絕餘花委碧苔。

次韻和岳季堅見寄

塵埃不見望諸君，江海誰憐鄭廣文。
雪裏一筇穿虎出，竹間半榻與僧分。
無人問字朝眠穩，有客論詩夜坐勤。
豹褰羊裘等黃土，金章紫綬漫浮雲。

題鑑湖送別圖

兩岸扁舟艤澄湖
祖帳開雲生秦帝碣
雨暎越王臺
荷氣清瑤席
波光灩玉盃
情深不忍別
欲去更徘徊

次韻和王文明雨中雜興四首

積雨累十日
平湖添半篙
風連箕畢動
雲傍斗牛高
水鷺巢林木
池魚上野蒿
農人愁餓莩
採擷到溪毛

白日迷陰陸
濃雲沒大荒
雨深筠簟潤
雲逼葛衣涼
虎豹歸林濕
魚龍赴壑長
波濤渺清落
悽惻解鳴璫

濕雲看欲薄陰氣未全收日月昏昏見鼃鼃
顴顴浮虛簷騰盼嚮壞壁湧蜉蝣幽獨無人問含情漫上樓

青冥不可見朱夏已無多雲水光浮沒川原氣盪磨荒
蕪一將畧浩汗五湖波去去滄浪水君聽鼓枻歌

次韻高則誠雨中二首

短棹孤蓬訪昔遊冷風淒雨不勝愁江湖滿地蛟螭浪
杭稻連天鼠雀秋莫怪賈生偏善哭從來杞國最多憂
絕憐窓外如珪月只為離人照白頭

霖雨蕭蕭泥客途，歲華冉冉隙中徂。
不知燕趙車千乘，何似高邛飯一盂。
露冷芙蓉捐玉佩，天寒薏苡結明珠。
東鄰艇子如堪借，去釣松江巨口魚。

吳苑西風禾黍黃，越鄉倦客葛衣涼。
楸梧夜冷烏驚樹，霜露秋清蜂閉房。
天上出車無召虎，人間賣卜有王郎。
干戈滿目難回首，夢到空山月滿堂。

次韻和謙上人秋興七首

一自中原萬馬奔，江淮今有幾州存。
龍韜豹畧癡兒戲，

穠李夭桃猛士門
廢壘秋風銷戰骨
荒郊夜雨泣冤魂
江湖愁絕無家客
佇立看天淚眼昏

東海波濤激迅颺
西風氛霧虎狼驕
高牙畫戟尊方伯
繡段黃紱出內朝
無客金戈擣鑿齒
有人玉帳舞弓腰
武陵日暮桃花盡
何處林泉可採樵

霜飛大野氣淒清
日落荒村少客行
投筆班超空食肉
登樓王粲獨傷情
海壖雨翳旌旗影
淮甸雲埋鼓角聲
中夜起瞻天北極
鬚毛蕭颯憶神京

浙江流水繞東吳佳麗猶傳故國都紅錦漫山春雨後
黃雲壓樹曉霜餘嬌鶯逐暖歸牙帳征雁衝寒送羽書
惆悵南園釣舟子蒺藜滿地不勝鋤

繡幕香幃隱日華金鞍玉轡巧矜誇深山霧雨羆生虎
大海波濤虺作蛇樸樾有枝寒集鵲梧桐無葉夜啼鴉
涼風嫋嫋吹游子何處松楸是汝家

故鄉知己不曾逢滿目雲山恨百重斤堠霜清寒夜柝
樵樓風急曉城鐘此時遶樹憐烏鵲異縣携家想駟螭

獨向晴簷問梅蕊數枝和雪為誰容

江上悲風起白波山中芳草奈愁何
紫菱青荇鮫人舞翠藟蒼藤木客歌
曠野煙塵迷虎兕長亭泥濘沒驪駒
濁河日夜東流去腸斷霓旌影馭娑

次韻和天童良上人見寄

不辭塵匣掩青萍願見天邊隕盜星
白日有時容黑子紫微終古照玄冥
輕風瀹雪歸蘭汜細雨涵春入草亭
但得此身彊健在江山相見眼長青

靈峰寺松風閣

靈峯寺閣倚松風
風細松高閣更空
何處流泉生石上
有人鳴玉下雲中
花飄霧露春香滿
影動龍蛇曉日融
安得身如列禦寇
翩翩高舉出冥鴻

秋興

天淨山月出水寒
沙鳥鳴孤燈秋後思
短笛夜深情江海
空哀鬢乾坤未弭兵
清都隔河漢訶禁有開明

晚思

返照吳山外歸雲越水頭寧捐白羽扇却著黑貂裘草
暖鳬鷺渚波香杜若洲艱難愧生事汗漫想扁舟

雲門寺作

若耶溪頭過新雨雲門寺前芳草長好將薜荔紉衣帶
更取辛夷結佩纓綠鬢朱顏非昔日茂林修竹是他鄉
東風且莫吹花盡遠客傷春易斷腸

次韻和朱伯言自雲門之天衣途中作

即看梅蕊發江南漸見柔桑可浴蠶日鑄雨餘峯似髻

雲門煙合樹如藍青猿不避游人過碧澗能消宿酒酣
幸有山僧頗解事何妨聊駐使君驂

法華山弘上人

可愛寒潭似鏡清清光寒氣襲軒楹草根流水泠泠出
石上潛魚箇箇橫翠靄驚風和露滴白沙得雨照人明
故鄉近報猶豺虎愁對滄浪詠濯纓

自天衣還城贈伯言

城上餘寒曉氣凝湖邊春樹綠層層一山獨表秦王望

衆水皆朝夏后陵白眼嗣宗終嗜酒青鞋子美漫尋僧
仙都石室烟霞裏早晚相携策瘦藤

為黃元徽題畫松

黃子宅邊松十尋兩株相倚自成林半空鸞鳳翻清影
長日笙竽奏好音豈但茯苓能却老更有琥珀可安心
風塵瀕洞還相憶寫掛高軒恨最深

題畫紅梅

水晶宮裏玉真妃宴罷瑤臺步月歸行到赤城天未曉


冷霞飛上六銖衣

題扇面牡丹花

沉香亭畔月華流
掌上孤鸞鏡裏愁
舞罷春風却回首
六宮紅粉總包羞

題扇面荷花

玉井芙蓉紅粉腮
何人移向月中栽
高軒忽漫看圖畫
疑是昭陽曉鏡開



誠意伯文集卷四